


ELEMBO YA SOLO OYO ETIOLAMI

 Tosangani na ntongo ya lelo na Nkombo na Nkolo Yesu, pe sima na kobondela mingi. Na ntongo ya lelo, nalamukaki ntongo-ntongo te. Nalamukaki na mwa sima ya ntogo, pe nabanzi ete moto nyonso ayebi ntina na yango, sikawa.

² Nakómaki na ndako, na ntongo mosusu wana, to na mpokwa mosusu wana, mozalani na ngai atelemaki na libanda, ye ná mwana na ye ya moke ya mwasi. Mwasi na ye azali infirmière na maternité kuna na lopitalo. Na bongo, ye azalaki na—na língénda moko na loboko, ya molai *boye*, ezalaki na—na mwa likomi moko likolo na yango, na eteni ya elamba, pe mwa likomi yango elobaki: “Nkóko Branham lokola ya, nabanzi, pene na ngonga ya 3:43 to 4:43, mokolo mwa 11 sanza ya zomi.” Na sima, ekomamaki minene mpenza na nse na kati-kati, ekomamaki: “Okómi mobange koleka ndenge ozali kokanisa.” Na bongo, napesameli mpenza nzela na bosembo sikawa, ya kopema mwa ntango molai koleka, na ntongo. Boye te, Ndeko Wright, ntango o—ntango okómi nkóko?

³ Na bongo, nabanzi ete epesi ngai nzela moke, na boye, Ndeko mwasi Kidd, na ntongo oyo, ndenge nalamukaki te ntango olekaki na ndako, kouta na Ohio. Nazali komiyoka mpenza lokola mibu zomi ebakisami, nakanisi, sima na yango. Kasi, ndenge bino nyonso boyebi, nazui mwa nkóko moko kuna, ya bakilo pene na misato ná gramme nkama mibale to nkama motoba, eloko ya ndenge wana, mwana moke ya bonzénga mpenza te koleka baoyo nasilá komona. Balobaki: “Azali lokola nkóko na ye ya mobali.” Na bongo. . . Pe nazalaki koluka komona ngambo ye azwaki, ngambo Billy azwaki.

⁴ Na bongo, lobi na mpokwa, ntango nazalaki koleka na couloir, sima na kosolola na bato na telephone, nakutanaki na baninga na ngai mpenza ya Georgie pe zinga-zinga, pe biso nyonso tozalaki wana, kotala ba-bebé yango. Pe bazali mpenza kitoko. Sikawa, bazali mpenza. . . Nazaláká ntango nyonso kobánza likambo ya boye: “Billy, okanisi ete okobuka bango, boyebi. Bazali mpenza mike.” Pe nakanisi ezalaki Ndeko mwasi Beeler nde alobaki. . . Nazaláká kokanisa. . . Ye pe azaláká kokanisa bongo, kasi, na sima, ayaki komona ete bakoki kobukana na pete te. Na bongo, nakanisi ezali malamumu bongo.

⁵ Lobi na sima ya nzanga nazuaki litómba ya kozala na ndako moko ya ndeko na biso ya mwasi ya losambo oyo, na ndako ya mwana na ye ya mwasi; pe nakanisi ete azali pe awa na losambo, esika babongisaki mwa bilei mpo na kotómbola-mobu ya Ndeko Neville. Asili koleka lisusu likonzi moko lobi. Na bongo tolobi na Ndeko Neville: “Mbotama elamu mpenza,” biso

nyonso, mpo azali ndeko moko malamau mpenza. Pe, na ntembe te, auti kolekisa mibu ntuku mibale na mitano, mwa moke, na bongo akómi lokola ngai. Na bongo, tosili koleka yango, mbala ya mibale. Ezali yango. Sikawa ezali kobanda kokóma mobange, ntango obandi koleka elembo wana mbala ya mibale, boyebi.

⁶ Namikaniseli ntongo oyo Frankie Weber ayaki awa. Azalaki mozalani na biso ya pembeni awa; mwana na ye ya mwasi azali kofanda kuna sikawa. Ye azali na Floride. Ngai ná Frankie tozalaki kokende elongo na eteyelo. Pe Frankie atiaki libonza na ye ya kotómbola-mobu. Pe na ntango wana nabandaki koteya pene na mibu misato to minei. Nakambaki Frankie epai na Nkolo Yesu. Pe atiaki libonza ya centime ntuku mibale na mitano. Nakanisi ete nazalaki na mibu ntuku mibale na mibale. Pe atiaki libonza ya centime ntuku mibale na mitano. Namilobelaki: “Holala, olingi koyebisa ngai ete Frankie Weber azali na mibu ntuku mibale na mitano? Fiuu! Holala, nazali kobanga ntango ngai nakokokisa mibu ntuku mibale na mitano.” Sikawa etikali moke nákokisa yango mbala misato, na bongo, kala mingi te. Na bongo, yango eumela koleka mpenza te.

⁷ Ntango nazali kobwaka miso awa pe komona Ndeko mobali ná Ndeko mwasi Kidd na mibu koleka ntuku mwambe, pe bazali kaka na makasi, namilobelaka: “Nkolo Yesu, limbisa ngai mpo na komilela-lela, na mibu ntuku mitano na mibale.” Pe bango. . . Yo ozali na mibu ntuku mwambe, pe Ndeko mobali Kidd azali na mibu ntuku mwambe na moko. Ezali bongo? Ntuku mwambe na moko. Pe bazali kokoba na lotómo. Boyoka, likambo yango epesaka biso mpiko. Boye te? Na ntembe te. Na ntembe te, Nkolo azali malamau mpo na biso.

⁸ Sikawa, ezali na likambo bobele moko, oyo nabangaka, ezali kosangana awa na ntongo, pe ezali. . . Ezali likambo ya nsomo, ezali komonana lokola mabe mpenza mpo na koloba yango. Kasi nazali na baninga mingi mpenza oyo bautaka mosika mpenza, mpo na—mpo na koya na mayangani.

Nazali komona ba-Evans awa te, kasi bazali awa, esika moko, nabanzi. Bazangisaka ata moko te. Boyebi soki batambolaka kilometre boni na motuka mpo na koyoka liteya? Kilometre nkóto mibale na ntuku libwa. Mobembo na bango ekoki kozala na nse ya dollars ntuku motoba to ntuku nsambo te, na mposo moko, mpo na kokende na losambo, ezali solo, mbala nyonso oyo bayaka awa ná libota na bango mobimba, koyaka na bango awa, bafutaka yango.

⁹ Sikawa, ezali bobele bango te, kasi botala elenge ndeko mobali oyo autaka kuna na Alabama, ayaka na mótuca pene na ntáka yango moko, mpóso na mpóso. Ndeko. . . Holala! Ndeko “Welt”? [Ndeko moko alobi: “West.”—N.D.E.] West. Azali lokola mwana, mpo na ngai. Azali—azali tata, azali na bana mingi. Kasi

akanisaka ngai yango ntango nyonso, azali komonana lokola elenge, ye ná mwasi na ye. Ndeko West.

¹⁰ Ndeko mobali ná Ndeko mwasi Palmer bafandi kuna na sima, bautaka kuna na nse ya Macon, na Georgie.

Pe—pe Ndeko mwasi Ungren, bayaka ntango mingi awa, bautaka kuna, na Memphis, na Tennessee. Bazali awa na ntongo oyo? Ngai—ngai. . . Bayaka mbala mingi. Ndeko mwasi Ungren ná—ná bandeko bautaka na Memphis, na Tennessee, kuna, iyo, bazali kuna na sima.

Ezali pe na bamosusu. Ngai. . . Bazali mpenza mingi, mpo na kotanga ba-nkombo. Bamosusu na bango bautaka kuna na súdi ya Kentucky. Bamosusu, na likolo, pembeni ya Chicago. Pe bamosusu bautaka na Chicago, pe koleka Chicago, zinga-zinga.

¹¹ Mokolo ya lomingo, nasosolaki ete mobali moko azalaki awa, autaki mosika, na Californie, azalaki bobele na ntango moke awa; alingaki kokutana na ngai. Na ntembe te, nasengelaki kokende nokinoki, sima na liyangani. Pe moto yango azongaki, ngai na ye tomonanaki te.

Moto mosusu ayaki awa, autaki mosika, esika moko boye, na Illinois. Soki moto yango azali awa na ntongo oyo: ezalaki bapóme ya kitoko pe elengi koleka oyo nasila kolia. Ayelaki ngai kitúnga ya ba-póme.

Pe moko na bandeko bautaka na Georgie, nabanzi ezalaki yango, to esika moko boye, ayaki na libóké monene mpenza ya ba-mbuma ya pécan, ya minene mpenza, monene lokola *boye*, mposo na yango. Pe, oh, nakoki mpenza kolia yango!

¹² Sikawa, na bosolo, nazali mpenza kolia bilei ya malamumu te mikolo oyo, kobanda ntango ya liwa ya mama na ngai. Nazali koluka elongi ya Nkolo mpo na emononeli ya sika. Nazali kolia bobele biloko ya petepete, mwa moke oyo nakoki kolia; nabungisi kilo libwa. Elingi koloba. . . Sikawa, nazali kokila bilei te. Ngai. . . Te, te. Yango, kosala bongo, yango bapesaka na Nkolo te. Bosengeli kopesa Nkolo makambo ya malamumu koleka bozali na yango. Ezali te. . .

¹³ Nauti pe komona Ndeko Sumner ná bandeko mosusu kuna na sima. Bazali mpenza mingi. Ngai. . .

Ndakisa, mokolo ya lomingo eleki, nazalaki kotánga ba-nkombo ya bato oyo—oyo bazalaki elongo na mama, pe nyonso wana. Pe ndeko mwasi moko ya bosembo mpenza azalaki wana. Nabosanaki kotánga nkombo ya mwasi yango. Sikawa, soki azali awa na ntongo oyo, álimbisa ngai. Moko na bango ezalaki Ndeko mwasi Beeler, pe mosusu ezalaki Ndeko mwasi ná Ndeko mobali Stephie. Pe, bazali mingi mpenza! Ngai. . .

¹⁴ Bino nyonso boyebi ngai malamumu mpenza pe boyebi ete nakánaka yango te, soki nabosani nkombo to nabosani moto. Bango nyonso bazalaki sembo mpenza! Pe mbala mosusu

nazalaka awa, pe nakotángá nkombo ya moto moko, oyo eyeli ngai na makanisi. Kasi ngai. . . Mpo na yango, nalingi koloba etónga mobimba, bato nyonso, bomoni, ezali mpenza malamamu. Na bongo, bato nyonso bazalaki na bolamu pe na boboto mpo na biso. Pe tosepeli na yango mingi mpenza.

¹⁵ Pe sikawa, na ntongo oyo, tokomeka lisusu kobeleva na Liloba na Nzambe. Sikawa, nalingi koloba maloba oyo, mpo ézala mpenza polele, ete na—nakendeke na liyangani ata moko te mpo na komimonisa. Nakendeke kuna te mpo na koloba: “Ee, nalingi, ntango mosusu, kobondela Nkolo mpo ápesa ngai li—Liteya oyo ekosala été bato básepela mingi mpenza pe báganga.” Tosilá komóná yango mingi, kasi, pe tosepelaka na yango. Ezali mabe te. Bomoni? Ezali malamamu mpenza. Bomoni? Kasi eloko nalingaka koyeba, ezali: “Nkolo, Yo, kamba makanisi na ngai na likambo oyo ekosungá bato, eloko oyo ekomema bango pene na Nzambe koleka, oyo eko—oyo eko—oyo ekozala na litómba mpo na bango.” Oyo wana, ezali mpenza kolendisa bango na molimo te, kasi kolendisa bango na boyebi pe kobanga ya Nzambe, mpo báyeba lolenge ya koteleva ngwi ntango mongúná akoya.

¹⁶ Nazalaki kosolola ná ndeko mwasi oyo ayaki kotala biso awa mpóso oyo, Ndeko mwasi Palmer. Alobaki, alingaki koyeba ndenge nini nasepelaka kofanda na etúka oyo. Ezali ete, soki okómi awa, pe, iyo, mbala nyonso nakómaka na lobwaku oyo, nakómaka na bokono bobele ntango nakómaka awa. Ezali mpenza na bosoto mingi na lobwaku oyo. Toyebi yango. Kasi Nzambe azali na ebele na bana awa. Na bongo, moko na mikolo oyo. . .

¹⁷ Nazali koluka elongi ya Nkolo sikawa, mpo na kozua Nsango kouta mpenza sémba na Nzambe. Bomoni? Pe ngai, na lisungi ya Nzambe, nazui mokáno kozela kino Akoya, elingi koloba kino kino Akoyebisa ngai likambo moko. Mpo nazali komiyoka ete esengeli. . . Eloko moko elingi kosalema awa, pe nalingi koyeba eloko yango. Nalingi koyeba yango sémba longwa na Nzambe, mpo nákoka koloba ezali YANGO ELOBI NKOLO. Bomoni? Na bongo—na bongo bokoki, bino, bato, ntango yango bokoyeba ete ezali ngai te. Na bongo, nalingi komeka kosala yango bongo, ete, to, koyoka Ye koloba liboso.

¹⁸ Mpamba te, soki Atii Maloba na Ye kati—kati na moto, ee, na ntango wana ezali lisusu moto yango te; ezali Ye. Na bongo, soki moto alobi yango, na ye moko, na ntango wana ekozala na litómba moko te, ata ndenge nini. Kasi soki Ye, Liloba na Nkolo, azali kati na moto yango, Ekokokisama, pe na bongo, ekozala—ekozala mpenza ndenge wana. Yango wana nde totindamaki kosala. Kati na Biblia, na mokapo ya 20 ya Dutelonome, nakanisi, Elobaki. Iyo. Bokeba. “Pe soki moto alobi likambo na Nkombo na Nkolo, pe likambo yango ekokisami te, na bongo bótaleva lisusu moto yango te.” Bomoni? “Kasi soki

balobi likambo pe ekokisami, na boye ezali malamu koyóka yango, bomoni, mpo euti na Nzambe.”

¹⁹ Nzambe asalaka ndenge wana. Asilá kotíá mwango na Ye mobimba awa na Biblia. Toyebi lolenge ya kotánga yango na mongongo makasi. Kasi makambo mosusu ezali, oyo—oyo mpo na Lingomba, mpo na eleko pe nyonso wana, oyo Akomá yango te awa na Biblia, na bongo, Atiáka Mongongo na Ye kati na moto pe balobaka Yango mpo na Ye, bomoni, basakolaka Yango. Boye, na bongo, lolenge ya kosambisa moto yango ezali, koyeba soki likambo esalemi lolenge balobaki yango. Na sima, soki esalemi, pe ezali kokoba kosalema bongo, ee, na ntango toyebi ete euti na Nkolo. Na bongo to—na bongo tokotia motema, na ntango wana, mpo na kokomilengela na likambo ekoya.

²⁰ Nalingi kotánga bisika mibale to misato na Makomi na ntongo oyo. Nalingi kotánga liboso na Buku ya Esode, pe nakanisi ezali na mokapo ya 4 ya—ya Esode, mpo na kobanda.

²¹ Pe sikawa nakoki kopesa liyebisi, ntango bozali komilengela mpo na kotánga Makomi yango, nakoki koyebisa makambo nalingi kolobela bino, makambo oyo Nkolo atii na motema na ngai mpo na kolobela, na ntongo oyo. Nayebi te likambo nini Akosala na yango, mpo na bato; ekoki kotindama sémba na moto moko awa, ekoki kozala mpo na moto moko, esika bande oyo ekokende, esika mosusu nyonso. Kasi nalingi kopesa liyebisi oyo, na ntongo oyo . . .

²² Nakanisi, moko ya lomingo eleki, nateyaki likolo na *Nzeneneke Ya Solo*. Pe na ntongo ya lomingo oyo, soki Nkolo alingi, nalingi koteya likolo na: *Elembo Ya Solo Oyo Etiolami*.

²³ Lobi na mpokwa, Ndeko Palmer azalaki koyebisa ngai ete na ntongo ya lomingo eleki nateyaki likolo na . . . to nalobaki ete, na lomingo oyo, nakoteya likolo na “Matákanelo minei ya Lingomba.” Pe ntango nakotaki lobi na mpokwa . . . Na momesano, nakomaka yango. Oyo . . . Nayebi te soki bino pe bosengelaka kosala bongo to te. Kasi ngai nazalaka na makambo mingi mpenza oyo namekaka kokanisela. Soki nazui eloko moko, nasengeli kokoma yango na eteni ya lokasa. Bomoni? Pe nakendeki kotala yango, pe likambo nalingaki koloba, likolo na yango, ezalaki mpenza matákanelo minei te. Nalobaki yango ndenge wana, ya solo. Kasi likambo nalingaki koloba, ezalaki: “Lolenge minei ya koyangelama ya Lingomba.” Mpo na kosala yango, nasengeli kosangisa makambo mingi likolo na mambi-ya-kala. Pe ntango mosusu mbala na sima nakozala na yango. Kasi ekozua ntango mingi koleka oyo nazalaki na yango, ntango ya koyekola yango, mpo na kososola yango, mpo ekosengela kozonga pe kozua ba-date, pe bongo na bongo.

Mpamba te, bino nyonso, bino nyonso bozali kososola ete ezali bisika nyonso. Ee, tolingaka koyeba makambo yango malamumpenza, liboso tóloba yango. Esengeli kozala solo. Mpo,

tozali awa, tozali kosala mosala ya motuya koleka nyonso oyo esalemaka na mokili: motei. Motei, pe tosengeli koloba makambo na bosolo pe na bosembo nyonso, kozanga kotatabana, esengeli bongo. Mpo na kosala yango, tosengeli kotalela Nzambe.

Sikawa, na Buku ya Esode, mokapo ya 4.

Bongo Mose azongisaki maloba ete, . . . tala, bakondima ngai te, bakoyoka pe mongongo na ngai te: mpo bakoloba ete, YAWE abimelaki yo te.

Pe YAWE alobaki na ye ete, Eloko nini wana ezali na loboko na yo? Pe alobaki, Língénda.

Alobaki ete, Bwaka yango na mabelé. Bongo abwakaki yango na mabelé, pe ekómaki nyoka; pe Mose akimaki liboso na yango.

Pe YAWE alobaki na Mose, Sembola loboko na yo, pe simba yango na mokila. Pe asembolaki loboko na ye, pe akangaki yango, pe ekómaki língénda na loboko na ye:

Mpo ete bándima ete YAWE Nzambe ya batata na bango, Nzambe ya Abalahama, Nzambe ya Yisaka pe Nzambe ya Yakobo, auti kobimela yo.

Pe YAWE alobaki na ye lisusu, Tia sikawa loboko na yo na ntolo na yo. Pe atiaki loboko na ye na ntolo na ye: pe ntango abimisaki yango, tala, loboko na ye ekómaki pembe pee, na maláli ya mbála.

Pe alobaki, Zongisa loboko na yo na ntolo. Pe azongisaki loboko na ye na ntolo na ye; ntango abimisaki yango na ntolo na ye, tala, esilaki kozonga lokola biteni mosusu ya nzoto na ye.

Pe ekosalema ete, soki bakondima yo te, pe soki bakoyoka mongongo ya elembo ya liboso te, boye bakondima mongongo ya elembo ya suka.

Bótala bilembo mibale, pe elembo moko na moko ezalaki na mongongo. Bótika nátánga lisusu molongo ya 8.

Pe ekosalema ete, soki bakondima yo te, pe soki bakoyoka mongongo ya elembo ya liboso te, boye bakondima mongongo ya elembo ya suka.

Pe ekosalema ete, soki bakondima ata bilembo wana mibale te, pe soki bakoyoka mongongo na yo te, boye okozua mwa mai na ebale, pe okosopa yango na . . . mokili: pe mai oyo okozua na ebale ekokóma makila na mokili.

²⁴ Sikawa na Santu Yoane, mokapo ya 1 pe molongo ya 6, tokotánga milongo oyo, to molongo oyo. Santu Yoane, mokapo ya 1 pe molongo ya 6. Pe . . .

Moto moko ayaki, atindamaki na Nzambe, nkombo na ye Yoane.

...moto moko atindamaki na Nzambe, nkombo na ye Yoane.

²⁵ Pe na Ezekiele 24:24, nalingi kokotisa Likomi oyo na kati, mpo na kosangisa yango longwa na Kondimana na Kala, koleka na basakoli, kino na Kondimana na Sika; mpo bósosola ete ezali na bisika nyonso, longwa na Esode, na ebandeli kino na suka.

Boye Ezekiele akozala elembo mpo na bino: bokosala makambo nyonso oyo ye asali: pe ntango likambo oyo ekosalema, bokoyeba ete nazali Yawe NZAMBE.

Sikawa tógumba mitó na biso mwa moke, wana tozali kobelema na Ye sikawa, na limemia, na nzela ya libondeli.

²⁶ Tata, Nzambe, toyei na Nkombo na Nzambe ya Abalahama, Yisaka pe Yakobo: Yesu Klisto moyengebene. Toyei, wana toyebi ete Akoyoka biso, mpo toyei te lokola moto oyo asilá koya na ndako oyo, kasi toyei na etingia ná kondima, wana tondimi ete makambo Alakaki, Akosala yango. Na bongo tosendi awa, Nkolo, ete Ózua moko na moko na biso baoyo tozali awa, kobanda na eteyelo kino na suka ya ndako oyo, bisika nyonso, mpo na kofungola motema moko na moko pe kokata ngenga ya koyoka na biso, mpo Liloba ya Nzambe na bomoi ékoka koya longwa na Likolo, na ntongo oyo, pe ésopana na mitema na biso, mpo tókoka kondima, wana tozali koyoka Liloba na Nkolo ndenge euti kotángamela biso na matoi na biso na ntongo oyo. Pe totondi Yo mpo na Liloba na Yo. Liloba na Yo ezali Solo.

²⁷ Pe sikawa, wana tozali komona ba-ntango mabe kobelema, nkanda nyonso ya Nzambe esangani na likolo. Pe ezali komonana ete na ntango nyonso, likambo moko ekoki kosalema na ekólo oyo, oyo etiki Yo, ete kopanzana monene ekosalema, oyo ekolongola mpenza ekólo oyo na kálati ya mokili, ná makámá sima na yango, ekouta na ekólo moko ezángá bonzambe, pe ezali na mposa mpenza ya kosala yango. Pe bayebi yango, esika ya kobelema pene na Nzambe, ezali lokola bazali kokoba kokende mosika. Bayebi ete Buku ya Emoniseli pe mobimba ya Makomi esilá kosakola liboso mokolo oyo, na bongo tika ete tózala na bokebi, Nkolo, tózala bato na goigói te pe tólala mpongi te, ndenge esalemaki. Tika ete tótelema pe tóminingisa.

²⁸ Tika ete tósosola, lelo, lokola naino tosala yango te liboso. Tika ete mitema na biso épela mpenza móto, sima na mokolo oyo, kino móto moko épela na bomoto na biso ya kati, épanzana na ekólo oyo mobimba, Nkolo, pe ézala litatoli ya bomoi bisika nyonso tokozala.

²⁹ Pambola babeli pe bato na mawa, baoyo bazali na bosenga, baoyo bazali awa ná baoyo bazali awa te, libota na Yo, bisika nyonso.

³⁰ Pambola Liloba na Yo, Nkolo. Bulisa mosali na Yo, ná basali na Yo oyo bakoyoka, mpo, elongo, tókoka kokóma kososola mpenza komonana na Ye, koleka nyonso liboso na bomoi. Nazali

kobondela bobele mpo na baoyo bazali awa te, kasi mpo na baoyo bakoyoka bande oyo na mokili mobimba, ete bákoka kokotisama na Lingomba na Nzambe ya bomoi. Mpo tososoli ete ezali na nzela bobele moko tokoki kokóma enama ya Lingomba oyo, ezali nzela ya kobotama na Molimo, na sima, tokobatisama na Molimo moko kati na Nzoto moko. E Nzambe, nabondeli mpo na moko na moko na baoyo bazali na mokili mobimba, ete Ózua nkembo mpo na Yo moko. Pe tika ete tóbongisa mpenza bomoto ya kati na biso, ete na mongongo moko, na mokili mobimba, tókoka kogánga: “Bobele bongo, yaka, Nkolo Yesu.” Tobondeli boye na Nkombo na Yesu Klisto. Amen.

³¹ *Elembo Ya Solo Oyo Etiolami.* Bato balukaka bilembo, kobanda na Fálo kino lelo.

Pe Yesu ayebisaki biso likolo na—na ntango moko oyo bato bakozala koluka bilembo, pe alobaki ete: “Libota mabe pe ya ekobo ezali koluka bilembo. Kasi, ata bongo, bakozua elembo.” Pe libota yango esengelaki kozua elembo ya lisekwa; ezali ete libota ya bolembu, ya mabe, pe ya ekobo, elembo ya lisekwa ekopesamela bango.

³² Kasi ndenge Likomi oyo ezali liboso na biso, na Ezekiele mokapo ya 24 pe molongo ya 24, mosakoli oyo akómaki elembo. Pe elembo yango nde nalingi kolobela.

³³ Moto oyo akómaki elembo mpo na Yisalaele. Pe na Makomi mobimba, Nzambe asalelaka basakoli na Ye lokola bilembo. Pe bazalaka ntango nyonso kotiolama. Emonanaka lokola bato basosolaka elembo yango te. Balukaka ntango nyonso elembo ya kotótómwa.

Ata Bafalisai na eleko ya Yesu, balobaki: “Lakisa biso elembo longwa na Likolo.”

³⁴ Kasi Yesu alobaki na bango ete bakozua elembo moko. “Bosili kozua elembo.” Alobaki: “Bokoki kosósola bilembo ya likolo. Bokoki kotala elembo yango. Bolobaka: ‘Soki ekómi motane, kokita, lobi ntango ekozala mabe.’”

³⁵ Soki batálaki elembo, pe batálaki Ye, balingaki koyéba ete Azalaki elembo ya Nzambe mpo na bango; mpo ete masakoli na bango, na ntina na Ye, ezaláki kokokisama na miso na bango. Kasi bango bakóbaki koluka elembo.

³⁶ Ezali likambo ya kokámwa ete bato bakosála bongo, baoyo bazali koluka elembo ntango oyo elembo ezali elongo na bango, kati na bango mpenza. Sikawa Yisalaele akómaki na lolenge yango.

³⁷ Pe ntango mosusu minióko oyo elembo esengeli koleka na yango ekamwisaka. Minióko oyo Yesu alekaki na yango, mpo na kondimisa elembo ya Nzambe, ete Azalaki Masiya.

³⁸ Tomoni awa, ete elenge mosakoli oyo na nkombo Ezekiele azalaki mbala mingi kokóma elembo, ntango nyonso. Azalaki

kominiókolo mpenza! Esika moko awa, tomoni ete aláláki na mopanzi na ye ya mwasi mikolo nkama misato na ntuku libwa. Nzambe ayebisaki ye ete ázua mwa madesu ná mwa súpu, ásangisa yango, álamba yango, pe átia yango pembeni na ye. Pe ákende kolala likolo na bilíki, pe álala bobele na mopanzi na ye ya mwasi; ábaluka te, mikolo nkama misato na ntuku libwa. Bókanisa naino. Na sima, alobaki: “Balúká na mopanzi ya mobali pe lálá lisusu wana mikolo ntuku minei.”

³⁹ Pe awa, Alobaki: “Likambo ozali komona, Ezekiele,” alobaki, “ezali mpo ozali komema mokumba ya lisumu na nko ya libota, nakotángá mokolo moko lokola mobu moko mpo na bango.” Ezali ete, mokolo nyonso oyo alalaki kuna, ezalaki mobu moko oyo bakozala na boombo, pe Nzambe akomikanisela masumu na bango ya nko, pe Nzambe akoyoka lisusu mabondeli na bango te.

⁴⁰ Kasi minióko oyo moto yango asengelaki koleka na yango, mpo na nini esengelaki kozala bongo? Bato mingi basila komituna, mpo na nini esengelaki na moto kosala likambo ya ndenge wana. Ezali mpo bato balingaka kotángá Liloba te, pe balingaka kobondela te. Na bongo, Nzambe azali na bonsomi, pe Atindaka mosakoli na Ye mpo na kozala elembo. Bato balingaka kotángá te. Bamipesaka na kotángá te. Pe balingaka kobondela te, mpo baleki . . . bazali na makambo mosusu ya kosala. Bakoki kozua ntango ya kobondela te. Pe mpo na bango, Biblia ezali motungísi. Ezali mpenza na ntina mingi te mpo na eleko ya mikolo oyo, to bileko mosusu nyonso.

⁴¹ Boyebi, nakanisi ete ezalaki Polo nde alobaki: “Bozali mikanda ya Nzambe, mitangami na bato nyonso.” Nzambe asalelaka bato lokola bilembo, mpo na kotalisa bilembo na Ye. Pe mbala mingi elembo yango, mingi na yango, longola bobele bato baponámi, elembo yango etiolamaka pe etalamaka eloko mpamba, esekamaka pe eboyamaka.

⁴² Pe ezalaki komonana, ata na Kondimana ya Kala, na eleko ya basakoli, bazalaki komona bango lokola bato oyo mitó ezali kosala malamú te. Bazalaki kokanisa ete basakoli yango babélaki libómá, ete eloko moko ezalaki kotambola malamú te na mitó na bango. Bazalaki komona bango kolongwa na bilíki pe—pe kosala bilembo, na sima bazongi na bango lisusu na bilíki. Pe bazalaki koseka bango, mpo bayebaki Makomi te.

⁴³ Mokolo moko, Yesu ayebisaki Bafalisai, mpo na lisekwa. Balobaki: “Tozalaki na . . . Mobeko elobi ete soki ndeko mobali akufi pe atiki mwasi kozanga ba—bana, ndeko na ye ya mobali asengeli kobala mwasi yango mpo na kobotela ye oyo akufaki bana.” Pe balobaki: “Tozaláki na moto moko oyo azaláki na bandeko nsambo. Ya liboso abálaki mwasi, pe akufaki, atikaki libota te. Na sima, ndeko na ye ya mobali abálaki ye, pe akufaki; pe bongo na bongo kino oyo ya nsambo. Pe na suka, mwasi yango

akufaki.” Balobaki: “Sikawa, na lisekwa,” balobaki, “sikawa, akozala mwasi ya nani, kati na bango nsambo?”

⁴⁴ Oh, nalingaka Liloba yango mingi! Yesu alobaki: “Bozali ntango nyonso kosala libunga, mpo boyebi Makomi te pe nguya na Nzambe te.” Oh, Alingaki mpenza kozimisa yango nyonso lelo, soki Azalaki awa! “Bozali ntango nyonso kosala libunga, mpo boyebi Makomi te pe nguya na Nzambe te.” Nguya na Nzambe ezalaka elongo na Makomi. “Bozali kosala libunga monene mpenza.”

Na sima, Akobaki mpo na koloba: “Na lisekwa bakobálana te pe bakobálisa te, kasi bakozala lokola Bánje.” Alobaki te ete bakozala Banje, kasi, bakozala lokola Bánje, ba-mposa ya nzoto ekolongolama kati na bango. Bakobálana te pe bakobálisa te.

⁴⁵ Tozali kobika na eleko ya bomoto . . . to mikolo ya kufa ya bokonzi ya kufa. Kasi ntango moko ekoya oyo Bokonzi ezangi kufa ekoya, pe Bokonzi ezangi kufa yango ezali esika basikolami bakofanda. Baoyo basili kosikolama, pe basili . . . Bomoï oyo ebimaka na nzoto oyo, mpo na kozonga na Nzambe oyo apesaki yango, ekozonga lisusu longwa na Nzete na Bomoï, mokolo moko, mpo na kokonza libela-na-libela.

⁴⁶ Elenge mobali oyo, elenge mosakoli, amipesaki mbeka pe akabaki bomoi na ye mobimba mpo na kozala elembo mpo na libota na ye, mpo na etúmbu balingaki kozua, mpo bazalaki baoyo tokoki kobenga “kozanga litómba”. Bazalaki na ntina na Nzambe te. Bazalaki kondimela basakoli wana te, bazalaki nde koseka bango. Pe, kasi, libanda na yango, ata baboyaki kondima yango, ata bongo, Nzambe amonaki ete, bazuaki yango.

⁴⁷ Yezabele aboyaki kondima ete Akaba azalaki mokengeli na ye, kasi azalaki yango. Nzambe amonaki ete, ata bongo, azuaki elembo.

Ezali pe bongo mpo na ekólo oyo lelo. Nzambe moyengebene pe sembo, na nzela ya Liloba na Ye, akokaki kotika te ete eloko moko, oyo tozali komona ekoka kosalema, kozanga kozala na elembo moko na esika moko boye. Azalaka na yango ntango nyonso. Sikawa, tosengeli koluka yango. Pe nandimi mpenza ete bato oyo bazali na lisosoli malamú ya Makomi bayebi lolenge ya kotala.

⁴⁸ Nowa azalaki elembo ya kosambisama ekoya, na eleko na ye, mpo na bato. Nowa, na eleko na ye, amonanaki lokola moto-alekisi-ndelo. Azalaki mosakoli. Amonanaki lokola moto oyo motó na ye ezali kosala malamú te. Pe moto yango alembaki te kobeta ndjondo, mobu na mobu, mpo na kotonga masuwa, ntango oyo ezalaki ata na mai na mabelé te, bobele maziba nde ezalaki. Pe asakolaki likambo moko ya nsoni, mpo na makanisi ya bato. Alobaki: “Mai ekouta longwa na likolo.”

49 Na ntembe te, bato mingi balobaki na ye: “Lakisa ngai esika yango ezali.” Zebi elobaki: “Nakoki kotalisa polele ete kuna na likolo mai ezali te.”

Kasi, ata bongo, soki Nzambe ayebisaki ye ete ekouta na likolo, Nzambe akosenzela mpo Liloba na Ye ékokisama.

50 Pe ntango wana ata mai moke emonanaki naino te, ntango wana ata lipata moko te ezaláki na likolo, ata litangá moko ye ya mbula ekwéyáki, eloko lokola mbula ezaláki ata moke te, kasi Nowa azalaki ntango nyonso kobongisa masuwa mpo na mbula. Ezalaki ndanga ya bomoi ete mosakoli oyo andimaki likambo azalaki kolobela, mpo azalaki komilengela mpo na yango.

51 Pe moto nyonso oyo andimi mpenza likambo azali kolobela, akomilengela mpo na yango.

52 Nátelema naino awa, miniti moke. “Na eleko ya Nowa,” ndenge Yesu alobaki, “ekozala pe bongo na Boyei ya Mwana na moto.” Soki, lelo, mangomba endimaki makambo bazali kolobela, balingaki kosalela makambo bazali koloba.

53 Ndenge nini tokoki kotonga bikeko minene ya ba-ndako, kotonga ba-ndako ya ba-milió ya ba-dollar, pe kopalanganisa minene ya bibongiseli pe makambo ya ndenge wana, pe koteya ete Klisto akoya na ntango nini? Ndenge nini tokoki kokoba kotalela ba-losambo na biso wana tozali komona yango kotangwa na nguya ya Nzambe mpo na kokota na makambo ya mokili, komema yango kati na lingomba pe kosangisa yango, pe topesi yango nzela? Mpo na lokumu, mpo na makanisi ya boike na bato pe bokeseni ya bibongiseli, bazali koloka koleka ebongiseli mosusu na bato, ndenge nini tokoki kosalela makambo tozali koteya? Pe mokili ezali komona yango. Bayebi yango. Na bongo, losambo ekómi lokola likambo ya kozala bobele moto ya molongo moko, to kozala moto ya lisangana moko boye, losambo.

54 Lobiko ya Klisto ezali lisangana te. Ezali te kokota na eloko moko. Ezali kobikela likambo na bomoi.

55 Sikawa, Nowa azalaki kotalisa likambo azalaki kolobela. Alobaki: “Mpela ya kosambisama ekoya likolo na libota oyo ya bato mabe. Pe longwa na likolo, Nzambe akosopa mbula, pe Akozindisa mokili mobimba na mpela.” Pe azalaki koloba bobele yango te, kasi azalaki pe kobongisa ekimelo, pe kobengisa bato koya kokota. Kasi baboyaki koyoka ye.

56 Kasi, Nowa, lokola mosakoli, azalaki elembo mpo na bato ya eleko wana, elembo oyo balobelaki yango mabe, moto oyo bakanisaki ete azalaki moto ya libóma; azalaki kobongisa eloko moko, oyo e—ezalaki na ndanga moko te, esika moko te, to esalemá naino te, oyo ekozala na ntina ata moko te mpo na yango.

Kasi ezali lolenge wana nde bato bazali kokanisa lelo. Bazali kokanisa kokimela likáma ya bómbe atomique. Ekimelo ya bómbe atomique ekosunga bino na nini ntango oyo ata nzete to libánga monene moko te ekotikala na mokili?

⁵⁷ Bisó tozali na ekimelo ya bómbe atomique, Moklisto azali na yango. Ndenge nalobaki, esili koleka ba-lomingo, to nazalaki kokanisa esika moko na nzela: “Ezali ekimelo ya bómbe atomique te. Ezali ekimelo ya komipesa, esika tomikótisaka na Yango, kokótisa motó liboso, ná motema mobimba, ná molimo mobimba, ná makanisi nyonso, kati na Klisto, masuwa ya kobátelama ya Nzambe.”

⁵⁸ Kasi, Nowa, amonanaki lokola moto na libóma, na eleko wana, na nzela ya bolémá ya mateya, pe kotalisa elembo liboso na bato, mpo na kokebisa bango, akweisaki mokili. “Akweisaki mokili, na kotonga masuwa,” wana mai ata moke ezalaki te mpo na kotepa likolo na yango. “Akweisaki mokili,” Biblia elobi bongo, na Baebete, mokapo ya 11. “Akweisaki mokili pe abikisaki ndako na ye moko, na nzela ya kobongisa,” pe azalaki elembo mpo na Nzambe, ya bitúmbu ekoya na eleko wana. Ezali mpenza likambo ya nkembo!

⁵⁹ Na mibu eyaki sima, elembo mosusu eyaki. Ezalaki Mose, mosakoli. Ezalaki elembo ya Nzambe mpo na Yisalaele. Bazalaki na boombo mibu nkama minei. Pe Nzambe abongiselaki bango elembo, liboso mpenza ya kosikolama. Azalaki elembo ya kosikolama mpo na Yisalaele, pe elembo ya kosambisama mpo na Ezipito.

⁶⁰ Nowa azalaki elembo ya kosikolama mpo na libota na ye, pe elembo ya kosambisama mpo na mokili ya babúngi, bazangi kondima. Bobele mai oyo ekangaki mokili péma pe emelaki mokili, yango moko nde ezalaki nzela mpo na kobikisa Nowa. Eloko yango moko oyo ebikisaki ye ezalaki kosambisama.

Eloko moko oyo ekobikisa Lingomba lelo ezali kosambisama, Nzambe azali kokitisa kosambisama.

Kasi Nowa ateyaki motindo moko. Akómaki elembo.

⁶¹ Bongo, Yisalaele, sima na mibu nkama minei, bakómaki kolela mpo na kosikolama. Pe Nzambe Amimonisaka te pe Amitalisaka te kino bato na Ye bakobéléma mpo na koyamba eloko Akotalisa.

⁶² Sikawa, oh, makambo mingi ekoki kolobama esika wana! Soki . . . Ndenge nini Nzambe atikaki ekólo oyo bolumbu. Bayebi yango malamú. Ba-zulunále esili kolobela yango, mbala na mbala, mbala na mbala. Bilembo ya Boyei na Ye esili kotalisama. Kasi bazali kokoba kokende liboso lokola bayebi yango te. Bakoki komilongisa te. Tokómi na suka.

⁶³ Nzambe atindaka basakoli na Ye bobele ntango bato bakómi na mposa ya mosakoli. Nzambe atindaka elembo na Ye ntango

bato babelemi mpo na elembo. Kasi, likambo ezali ete, bato, mbala mingi te... Bakómaka na esika moko oyo bakómaka na mposa ya kotótómwa, to bakómaka na mposa ya: “Lakisa biso elembo longwa na Likolo.” Kasi ntango Nzambe akotinda elembo, na ntango wana, bakobóya komona yango. “Na yango, ebombami na miso ya moto na bwanya pe ya mayele, pe emonisami na bana mike baoyo balingi koyekola.” Batiolaka yango, elembo.

⁶⁴ Yisalaele esengelaki mpenza koyeba, ntango mwana kitoko yango abotamaki, ntango batombolaki miso kuna pe bamonaki, na e—eleko ya mibu bazalaki kobika na yango: “Libota na yo ekozala mopaya mibu nkama minei, na mbóka mopaya, kasi na sima Nakobimisa bango kuna.” Basengelaki koyeba ete ntango ekómaki pene, ntango bamonaki mwana kitoko yango kobotama. Mpo, ata mama ná tata, Amirame ná Yokebede, babangaki mibeko ya mokonzi te, pe batiaki ye mpenza kuna na ebale, esika ba-ngandó bazalaki; ata moko na bango te akokaki koswa ye. Bamonaki ete elembo moko ezalaki wana, kasi baboyaki koyeba yango. Babelemaki te mpo na yango.

Nzambe amemaki ye kuna pe Akotisaki ye na ndako monene ya Fáló, pe Atikaki Fáló kobokola ye pe kolakisa ye mayele nyonso akokaki koyeba, mpo na kotalisa (Nzambe) lolenge Asalaka makambo, na sima amemaki ye mosika kati na bilíki, ete ábosana makambo nyonso wana.

⁶⁵ Fáló azaláká kolakisa ye makambo ntango wana. Nzambe akómaki kolakisa ye. Fáló azuaki mibu ntuku minei mpo na kolakisa ye makambo, na sima Nzambe azuaki mibu ntuku minei mpo na kolakisa ye makambo, ete ábosana makambo nyonso wana. Kelasi ya moto; pe kelasi ya Nzambe.

Fáló azalaki kolakisa mwana na ye mpo ákóma mokambi, molobeli-makambo malamu, mpo ákóma mobundi, moto-na-etumba, mpo ákóma Fáló akoya mosusu, oyo akobátela Ezipito na bisika ya likolo, kolóna bikólo nyonso mosusu pe kofutisa bango mpako mpo na Fáló. Kasi Nzambe amemaki ye mosika kati na bilíki, alongolaki ye makambo nyonso wana. Pe Alakisaki ye, bobele na miníti mitano, na nzela ya nzete ezali kopela móto, ete Azalaki Nzambe na bomoi. Pe alongolaki ye nsómo nyonso; abelemisaki ye. Azalaki elembo.

⁶⁶ Nzambe alingaka ete bato na Ye bábondela. Pe ntango Yisalaele esengelaki kofuta mpako mingi koleka, na lolenge wana, bakokaki lisusu kokende mosika te, ntango na bango ekokaki, pe mikumba na bango elekaki monene, koleka ndenge bazalaki kokanisa, na ntango wana babandaki kobondela. Pe ntango bato babandi kobondela, na ntango wana Nzambe abandaka koyoka. Ntango ekokaki mpo Liloba na Nzambe ékokisama.

⁶⁷ Na bongo, ntango Amirame ná Yokebede bamonaki ete ntango ekokaki mpo Liloba ékokisama, babandaki kobondela Nzambe. Pe na momesano, baoyo babondelaka ezali baoyo bazalaka na mokumba, baoyo bazuaka eloko moko. Ezali baoyo babondelaka, baoyo Nzambe abongisá mpo na kosala yango.

⁶⁸ Na ntongo oyo, tozalaki kosolola, ezalaki biso na mésá kolia, tozalaki kolia noki-noki lipa batumbá ná biloko mosusu, mpo na kokende na losambo. Likambo moko elobamaki mpo na moto moko oyo azaláká, mosika na awa, azongelaki komela makaya sima na ye kobikisama na cancer. Nalobaki: “Ezali mawa mingi.”

⁶⁹ Na bongo, moto moko atiaki mai na monoko te pe alobaki: “Yango ezali likambo ya nsómo koleka ya kokabwana na yango, ezali, komela makaya.”

⁷⁰ Nalobaki: “Nayebi yango. Mpo ezali molimo mabe.” Pe nalobaki: “Ezali—ezali molimo mabe.” Pe nalobaki: “Okoki kotika yango te, bobele soki nguya na Nzambe ezali likolo na yo.”

Nayebi bato mibale na ebandeli na bomoi na ngai, bango nyonso mibale bazalaki na mposa ya kozala bato na Nzambe.

Moko na bango, bobele ntango namemaki ye na Klisto, alingaki kopelisa likaya. Azaláká komela paké mitano to motoba na mokolo, kofanda se wana, pe kopelisa moko sima na mosusu, mokolo mobimba. Bongo, alingaki kopelisa likaya mosusu, bongo Eloko moko epekisaki ye kosala yango. Akendeki esika rechaud ezalaki, ayebaki te ete Makomi epekisaki makambo wana, apelisaki yango pe atindikaki paké yango kati na rechaud. Pe likambo yango esilaki.

⁷¹ Wana, moto mosusu oyo alingaki kokóma Moklisto, pe amekaki na makasi na ye nyonso. Alelákí epai na Nkolo. Atikaki yango, mpóso mibale to misato. Ntango makanisi na ye ezongaki, na lolenge wana, abungisaki makanisi na ye. Ntango makanisi na ye ezongaki, amimonaki na sima ya ndako, kobeta motó na eteni ya ebende. Akotaki na ndako, na lombangu mpenza, azuaki makaya na ye, pe amelaki paké mobimba, liboso ábima na ndako na mpokwa wana, moko sima na mosusu. Bomoni?

⁷² Moko abengamaki. “Moto moko te akoki koya epai na Ngai soki Tata na Ngai abendi ye te, pe baoyo nyonso Tata apésáki Ngai bakoya epai na Ngai.” Likebisi yango elingaki koloba nini? Ezalaki Bomoi, mpo na moko. Amonaki Yango. Okoki komona yango te soki Nzambe amonisi Yango te. “Ebombami na miso ya bato na bwanya pe na mayele, pe emonisami na bana oyo balingi koyekola.” Ya solo.

⁷³ Amirame ná Yokebede bayebaki ete ntango ekokaki. Ngonga yango ekómaki pene.

⁷⁴ Pe nalingi koloba boye wana nazali kolobela yango. “Ezali ye oyo alingi te, to ye oyo apoti mbangu te; ezali Nzambe oyo ayokelaka mawa.” Ezali solo. Ezali Nzambe.

⁷⁵ Ezali pe bongo, lelo! Oh, tika ete ékota na bozindo mpenza! Soki, lelo, Nzambe abengaki yo, pe okabwani na makambo ya mokili, pe nguya na nkembo ya Nzambe ebulisi yo na makambo yango, osengeli kozala moto na esengo koleka na mokili mobimba. Bato milió na milió balingaki kosala yango soki bakokaki, kasi bakoki te. Bango bakoki kozala na yango te. Oyo ezali eleko oyo Lingomba ebengami kobima, kokabwana. Ekesei na ndenge ezaláká. Iyo.

⁷⁶ Ntango bato babandaki kobondela, ntango Yisalaele abandaki kobondela mpo na mosakoli, Nzambe azalaki na mosakoli. Nzambe azalaki na mosakoli, ntango nyonso wana, mpo Nzambe azalaka ntango nyonso mosika liboso na bango. Asilaki kobongisa moto yango, kasi Azalaki kozela ete bato bábanda kobondela, ete bato bákóma na mposa na yango.

⁷⁷ Ezali mpenza, nakoki koloba, elilingi ya lelo! Eloko tosengeli na yango lelo, ezali motei ya kolamukisa te, ezali moto mosusu te ya ebongiseli ya monene, oyo akosangisa bitóngá nyonso na ebongiseli moko. Eloko tosengeli na yango lelo, ezali mosakoli oyo atindami na Nzambe, ná Nsango oyo ekokweisa mokili. Nzambe akoki kozala na moto yango, soki bato babelemi mpenza mpo na yango. Boyebi likambo nazali koloba. [Losambo balobi: “Amen.”—N.D.E.] Ntango mosusu Asili kozala na moto yango esika moko na mokili, kasi esengeli ete bato bázala na mposa na yango. Nzambe amelisaka bato biloko na mongóngo na nkó te. Bosengeli kozala na mposa na yango. “Esengo na baoyo bazali na nzala pe na mposa ya boyengebene, mpo bakotónda.” Ezali solo.

⁷⁸ Ntango Mose andimamáki...Ezalaki nde sima na bato koyeba ete basengelaki na mokambi, babandaki kobondela. Babandaki kobondela Nzambe mpo átindela bango mokambi, to moto mpo na kobimisa bango. Pe Atindelaki bango moto moko, mosakoli. Ezalaki elembo na Ye. Sikawa, soki moto yango azalaki mosakoli te, soki atelemaki pe alobaki: “Nazali sodá ya mayele mingi,” Yisalaele azalaki na makoki ya koboya kondima moto yango. Mpo ete, Nzambe, na ntango nyonso, kozanga kokweya, atindaka mosakoli. Bólakisa ngai bobele mbala moko na Biblia, esika yango esalémá. Atindaka ntango nyonso mosakoli ná YANGO ELOBI NKOLO.

⁷⁹ Ata Dawidi, ye moko, sodá monene ya mayele mingi koleka, oyo Yisalaele asilá kozua, kasi, ata bongo, Dawidi azalaki mosakoli. Azalaki mpenza yango. Azalaki mosakoli, Dawidi.

⁸⁰ Azalaki kozela ete bato bákóma na mposa, na mitema na bango, ya koyoka mosakoli oyo Alingaki kotinda.

Na ntembe te, bato mosusu bazalaki koloba ete bazalaki na yango, kasi bazalaki na yango te. Etalisamaki polele na

sima ete bazalaki sembo te. Bamikotisaki mpenza na mobulu pe na kotótómwa. Pe Biblia elobi: “Ebele ya bato ya ndenge na ndenge bakendeki elongo na bango.” Basalaki nini? Bamemaki mobulu kuna na bilíkí. Pe mbala nyonso oyo likambo monene ya kokamwa esalemaka! Oh, soki nakoki kokotisa yango na bozindo, ekozala malamú. Ntango nyonso oyo Nzambe atindaka eloko moko, ezalaka na komekola moko makasi ya nzoto oyo etambolaka na yango. Ntango nyonso, ezalaka ntango nyonso na eloko moko, “lokola kondima”, ebandaka malamú mpenza kati na bato.

Kasi mosakoli ya solosolo ya Nzambe akangamaka na YANGO ELOBI NKOLO. Akotika ata moke te Makomi yango soki atindami na Nzambe.

⁸¹ Mose atelemaki ngwi na Makomi. Nzambe alobáki: “Ngai nakobimisa bango.” Alobaki na Mose: “Nasili kotindo yo mpo na kosala mosala yango.” Pe Mose abikelaki likambo. Asilaki kokutana na Nzambe. Azalaki na Liloba ya Nkolo.

⁸² Ntina oyo Nzambe atindaka basakoli, ezali mpo bazalaka na Liloba na Nkolo. Liloba na Nkolo eyaka na basakoli. Pe soki azali na Liloba na Nkolo te, boye azali pe mosakoli te.

⁸³ Ezali na komekola mingi ya nzoto oyo elukaka koloba ete bazali basakoli, na bileko nyonso, kasi batángwaka ntango nyonso mosika na Liloba na Nkolo. Kasi mosakoli ya solo atelemaka ngwi na Liloba. Sikawa, bobosana maloba yango te. Mosakoli ya solo akangamaka na YANGO ELOBI NKOLO.

⁸⁴ Yesu akebisaki biso na mikolo ya suka mpo na makambo oyo ekosalema. Kasi mo—mosali ya solo, mosakoli ya solo, azangaka ata moke te kokangama mpenza na YANGO ELOBI NKOLO.

⁸⁵ Mose akangamaki na Nkolo. Azalaki elembo. Azalaki elembo mpo na Yisalaele, ete mikolo ya kosikolama na bango ekómaki pene, pe azalaki elembo mpo na Ezipito, ete eleko ya suka na bango ekómaki pene. Mpo, na sima, bazindisamaki kuna na Mai-na-mbu ya Kufa, mampinga nyonso ya Fálo. Bakómaki na suka ya nguya na bango ya mampinga, pe mosakoli azalaki elembo ya suka ya ekólo.

⁸⁶ Bókanisa naino, ndenge Nzambe azali monene, pe ndenge Asalaka makambo na komikitisa. Na ntembe te, soki moyínga akoki kososola yango, moto na mayele asengeli pe. Amen. Soki baombo kati na mabulu ya potopóto ya Ezipito bakokaki kososola ete oyo wana azalaki mosakoli kouta na Nzambe, pe ngonga esilaki kobélema, koleka boni ndako ya Fálo esengelaki koyeba yango. Kasi bato ya ndenge wana nde bayebaka yango te. Bato ya ndenge wana nde bazangaka yango, ntango nyonso. Ntango oyo . . .

⁸⁷ Mose azalaki wana, kotala na maninisa yango, bana yango ya Yisalaele koleka. Mpo na Yisalaele . . . Mpo na Fálo, bazalaki baómbo pe ba-mbwá. Mpo na Mose, bazalaki baponami na

Nzambe. Biblia elobi ete: “Mose aponaki,” ye moko nde aponaki, “andimaki nsóni ya Klisto, amónaki ete ezalaki na motuya monene koleka bisengo ya lisumu, mpo atiaki miso na ye epai na libonza.” Mose ayebaki ete bato yango bazalaki bapóti-potopóto te; bazalaki libota oyo ezalaki na elaka.

⁸⁸ Ye moko ayebaki nani azalaki. Akokaki koyebisa bango te. Basengelaki koyeba yango bango moko. Ye moko ayebaki mosala na ye, oyo—oyo asengelaki kosala. Ayebaki ete Nzambe atelemisaki ye mpo na ntina wana, kasi akokaki koyebisa bango te. Pe ntango nyonso oyo bazipamaki miso mpo na yango, ye moko amimonisaki polele te, kino bango báyeba yango. Na bongo, bamonaki elembo yango, pe bayebaki yango.

⁸⁹ Alobaki: “Nakopesa Yisalaele elembo. Zua língenda oyo; kómisa yango nyoka. Bakoyoka yango te. Na sima, tia loboko na yo na ntolo na yo, bimisa yango, mibikisa na maládi ya mbálá, na bongo bakondima yango. Na boye, soki baboyi koyoka yango, zua mai na ebale Nili kuna, sopá yango na mokili mokauki, pe mai nyonso ekokóma makila.” Ezalaki elembo mpo na ekólo. Bato bakondima yango. Na ntango yango, baoyo babélemi mpo na koyamba yango bakondima yango, ntango bakomona elembo ya Nzambe na mosala, kasi ekólo esengeli kozua eloko ya ndenge mosusu. Na bongo, Apesaki bango nyonso elembo.

⁹⁰ Nzambe asalelaki moto, moto ya komikitisa, mosakoli, mpo na kozala elembo ya suka ya lolenge ya ekólo oyo wana. E Nzambe, tindela biso lisusu moko. Télémisela biso lisusu moko. Soki bato na Nzambe babandi kobondela mpo na likambo ya boye, Akotelemisa ye. Ezali ete, bato basengeli kozala na mokumba yango. Basengeli kolamuka. Basengeli kososola. Basengeli koyeba ntango nini tozali kobika na yango, pe makambo nini ezali zonga-zonga na biso, liboso bákoka kolamuka.

Bozali kokoba kobika bobele ndenge bobikaka ntango nyonso. “Nasengeli kotonga ndako ya sika mobu oyo. Nasengeli kosomba motuka ya kitoko koleka ya ba-Yoane. Nasengeli kosala *boye*.” Oh, makambo mingi likolo na *oyo!* Ntango ososoli ete ata... Ezali mabe te. Kasi osengeli kososola, ndeko, ete biloko nyonso wana ekobeba.

Yesu alobaki: “Kobanga moto oyo akoki koboma nzoto te,” bombe atomique ya Russie. Kobanga te ye oyo akoki kokómisa nzoto oyo putulú ya volcan, na miníti moke: “Kasi banga Ye oyo akoki kokómisa nzoto lolenge wana pe kobwaka molimo na lifelo.” Ezali yango.

⁹¹ Ndenge nazalaki kosolola na monganga moko, kuna na lopitalo, ntango mama na ngai azalaki kuna. Azalaki kolobela mpo na monene ya zebi, ndenge esalisaka makambo ndenge na ndenge ya nzoto, pe batiaka nkisi kati na yango, pe okomona ndenge ekoboma ba-microbe, pe ekobátela momboto

ya bomoi. Nalobaki: “Ezali mpenza malamumu mingi. Ezali mpenza kokamwisa.” Nayokaki ye mwa ntango moke. Kasi nalobaki: “Monganga, ezali malamumu. Nasepelaka na yango. Ezali mpenza malamumu mingi. Na bosólo, na—nazongisaka matondi na Nzambe mpo na yango. Kasi, tala, bozali kolekisa bomoi na bino mobimba mpo koluka kozua eloko moko likolo na bozalisi. Kasi mpo na nini, na ntango moko, bokoki kokanisa te na Ye oyo akelaki yango, Ye oyo asalaki yango, Ye oyo azalisaki yango? Nzambe azali mozalisi na yango.”

Koleka na motuya boni Mokeli aleki bozalisi oyo Akelá! Mpo na nini totiáka litomba mingi na bozalisi, wana tokanisaka Mokeli te Oyo akelá likolo ná nse, pe asálá nzoto ná bomoi? Akoki kobebisa yango ntango nyonso Alingi, mpo ezali ya Ye.

⁹² Oyo ekómi likambo ya malamumu mingi mpenza, kosalisa nzoto ya moto. Tosepelaka na yango. Bakoki kopesa moto líso mosusu, longwa na moto moko mpo na moto mosusu; kozua mwa misisá mike-mike wana, kobimisa líso ya moto na esika na yango pe kotia yango esika ya líso ya moto mosusu, pe moto yango akoki komona na líso yango. Ezali likambo ya malamumu.

⁹³ Kalakala, soki mama moko, ntango asengelaki kobóta mwana, pe mwa—mwana yango akokaki kobótama te, asalamaki—asalamaki bongo, ete mwana akokaki kobótama te: mama ná mwana, bango mibale, bazalaki kokufa. Ezalaki solo. Kasi bino boyokaka yango mpenza te, ezaláká ndenge mosusu, ntango mosusu boyóká yango te. Kasi lelo bakoki komema mama yango, sima na ye kobéléma mpo na kobóta mwana, pe soki, ntango mama akómi mpenza pene na—na ntango ya kobóta, bomoni, bakoki komema mama yango na chambre moko, bakopésa ye mwa anesthesie, pe bakobimisa mwana yango, na mbótama ya momesano, bakoza mwana yango. Tosepelaka na yango.

⁹⁴ Bólakisa ngai lolenge ya kosala moko. Soki okangi valve moko awa esika moko, na makambo ya mai na engumba oyo, okomona eloko nini ekosálema na valve ya monene. Ekopanza yango.

Kasi, ata bongo, biso tokoki kokata lokolo, kokata lobóko, pe, na ekamwiseli ya Nzambe, Akolekisa makila yango na nzela mosusu, na seconde moko mpamba, pe akolekisa yango nokinoki na nzela mosusu. Bozali kobikisi bomoi ya moto. Nani akoki kosala yango? Bóyebisa ngai.

⁹⁵ Kokáta mosisá, kokáta tuyau monene ya mai awa esika moko, wana ezali koya na lombangu longwa na valve. Ekosala nini? Meka yango mokolo moko mpo tálá eloko ekosalema. Nzela mosusu ya koleka ezali te. Esengeli kozonga kino na valve.

Soki Nzambe ábongisaka nzela te mpo makila yango éleka yango moko mbala moko, kokende pe kozonga na motema, bokokufa. Mbala nyonso mosapi na yo efinamaki, ezalaki kufa

mbala moko. Mbala nyonso ozokaki esika moko, pe mosisá to eloko mosusu ekátánaki, ezalaki kufa mbala moko. Soki okataki mosapi na yo, olingaki kokufa. Esili. Ekozonga mbala moko na motema na yo. Ekoboma yo. Kasi Nzambe . . .

⁹⁶ Sikawa, tokanisaka ete ezali malamu. Tokanisaka ete ezali malamu. Pe tosepelaka ndenge zebe, bakoki kosangisa misisá yango mpo ébimisa makila te. Nyonso wana ezali malamu. Kasi Nani Moto asalaki yango? Bomoni? Totálaka mingi bozalisi pe tobósanaka Mokeli na yango. Bomoni? Totalaka makambo ya mokili, pe tobósanaka makambo nyonso ya molimo. Yango wana nde tosálaka.

⁹⁷ Sikawa, basakoli ya Nzambe, bazalaka . . . bazalaka na Liloba na Ye. Yango nde ntina bato bandimaka bango.

Yango nde ntina Nzambe alobaki na Mose, Alobaki kuna na Genese, bisika mingi, na Esode, na bisika ndenge na ndenge: “Soki moto moko ayei kati na bino, oyo azali moto na molimo, to, mosakoli, sikawa ndenge nini tokoyeba makambo yango?” Alobaki: “Soki alobi likambo pe ekokisami, alobi likambo mosusu, ekokisami, na bongo bóndima yango.” Bomoni? Ezali elembo.

⁹⁸ Na bongo, Apesaka Liloba na Ye, na bakambi te, na bato na bonkonzi-na-nko te, kasi na basakoli. Khrouchev azali elembo mpo na mokili te. Te, misie. Hitler azalaki elembo mpo na mokili te. Kasi esika moko, epai moko, Nzambe azali na mosakoli moko ya komikitisa, oyo azali kozela ngonga yango. Azali elembo. Azali elembo oyo ekokweisa mokili pe ekobikisa Lingomba. Mosakoli!

⁹⁹ Eliya azalaki elembo na eleko na ye, mosakoli Eliya. Mpo na . . .

Azalaki e—azalaki elembo ya Liloba na Nzambe, kosambisama mpo na Ezipito pe kosikolama mpo na Yisalaele, soki balingaki kondima ye.

¹⁰⁰ Na eleko wana ya masumu ya Eliya, ntango Yisalaele mobimba esilaki kopesa Nzambe mokongo, basilaki komikotisa lisusu na masumu. Basilaki kobósana molongó. Basilaki kobósana likambo ya kokambama na Nzambe, Yaweh monene oyo afungoláká Mai-na-mbu Motane, pe abimiséká bango na Ezipito, ná mosakoli monene lokola Mose kati na bango. Basilaki kobosana yango.

Biso tobosani yango. Bino ba-Methodiste bobosani John Wesley. Bino ba-Lutherien bobosani Martin Luther. Bino ba-Batiste bobosani John Smith. Mingi kati na biso tobosani Charles Finney, oyo aleki bango nyonso.

¹⁰¹ Elobamaka ete bandimi ya Finney ntuku libwa na nsambo likolo na mokama batelemaki ngwi. Ntuku nsambo na mitano likolo na mokama ya bandimi ya Moody bazongaki sima, na

mobu moko. Pe baoyo ya Wesley, etónnga ya babulisami, bazalaki ntango nyonso kozonga sima. Kasi Finney azalaki na bango ntuku libwa na nsambo likolo na mokama. Moto moko mokuse, nzoto mike ná libandi, soki ayei na eteyelo pe abwaki miso likolo na eyanganelo yango, ndenge *wana*, bato bazalaki kokweya sénza, mpo azalaki na lisóbe, mokolo mobimba kino Molimo Mosantu esimbaki ye. Ya solo. Azalaki elembo, pene na mibu nkama mibale, ya suka ya kolamuka monene oyo Wesley ná bamosusu bazaláká na yango, pe kosambisama oyo ekoya.

¹⁰² Azalaki elembo, eleko ya masumu wana. Pe lolenge Eliya akokaki kozala wana ye moko, na mpiko pe molende, moto moko te elongo na ye, kasi azalaki elembo ya Nzambe.

Ba-nganganzambe mosusu nyonso balandaki Akába, na lolenge ya makambo ya mikolo oyo. Bakómaki bato ya makambo ya mikolo oyo, na ekeke wana. Kasi mobange Akába, mobange Akába, ná bozui mingi na ye nyonso, oyo ememaki lingomba mobimba kati na bo-Katoli-. . . to, na bo-Katoliko te, kasi ezali likambo yango moko: kokota na losambo ya bikeko. Ememaki bango esika oyo bakómaki na botaú. Bamóko bakómaki kosámbela *boye*, ná bonsomi: “Bokoki kosala nyonso bolingi.” Pe bakómaki na makambo ya lolenge wana.

¹⁰³ Pe Eliya atelemaki wana, ná mpiko nyonso, azalaki na YANGO ELOBI NKOLO. E Nzambe, pesa biso bato ya ndenge wana. Abangaki te koyebisa Yezabele mabe na ye. Azalaki na kobanga liboso na Akaba te. Abangaki te ete azaláki na libunga. Atelemaki na mpiko nyonso, abélémaki liboso na Akaba, pe alobaki: “Ata mamwe ekokita te kino nakobéngisa yango.” Amen.

¹⁰⁴ Azalaki nini? Elembo mpo na eleko wana ya masumu. Yisalaele amonaki yango nde? Te. Basekaki ye, batiolaki ye.

Asakolaki ete bokauki ekoya, ete—ete mpasi, nzala, nzala makasi ekoya. Pe asakolaki na mpiko nyonso, azalaki wana ye moko, ná YANGO ELOBI NKOLO. Alobaki: “Nkolo, basili koboma bato nyonso ya solo. Basili koboma bango nyonso. Natikali bobele ngai moko, oyo nakangami na Liloba na Yo.” Kokoso ezalaki na ntina nini? Liloba na Nzambe. Eliya alingaki kokangama na Liloba. Azalaki mosakoli ya solosolo.

¹⁰⁵ Basakoli mosusu balobáká: “Oh, ee, ezali mpenza na bokesene mingi te. Yaweh akotála yango te, boyebi.”

Yaweh akotála likambo yango. Esengeli kozala Liloba na Ye. Pe Eliya, na mpiko nyonso, atelemaki ngwi na Liloba yango, ná YANGO ELOBI NKOLO. Nzambe apesaki ye sekelé moke, mokolo moko. Alobaki: “Eliya, Nazali na bato nkoto nsambo awa, oyo ozali motatoli mpo na bango. Bazali na makasi esengeli te ya koya kotatola yango. Bazali komibomba na lisobe. Kasi, ata bongo, na mitema na bango, bazali basali na Ngai. Bafukameli Baála te. Bazali kobanga kosala yango. Kasi, Nakopesa yo

elembo, pe yo ozali elembo. Kende kotelema kuna, pe telema ngwi na Liloba na Ngai. Nakobatela yo. Pesa bango elembo.” Aleluya!

Nzambe, tindela biso eloko moko ya ndenge wana, ekozala elembo ya Liloba na Nzambe. Pe elaka nyonso oyo Nzambe alakaki ekotatolama kati na moto yango, mpo azali elembo, elembo oyo babosani.

¹⁰⁶ Oh, bakanisaki, mpo Akába azalaki mokonzi monene pe bikólo nyonso ezalaki kobanga ye, likambo yango ezalaki malamú mpenza. Kasi Eliya azalaki elembo ya Liloba. Yango nde mosakoli ya solo, elembo ya Liloba. Na bongo, ntango oyo azalaki elembo ya Liloba, bandimaki ye te. Bazalaki na ntina na ye te.

¹⁰⁷ Azalaki elembo mpo na mwasi-mokufeli-mobali, ntango Nzambe atindaki ye longwa na Ngomba Kar mele, longwa . . . na mokele ya Kerite. Atindaki ye kuna, sima na ye koleisama na biyanganga, pe mokele kokauka. Akendeki na ndako ya mwasi-mokufeli-mobali yango. Esika nini boye mpo na motei! Kasi akendeki kuna mpo Nzambe ayebisaki ye ete ákende. Kasi akendeki kuna. Alobaki: “Napesi ye motíndo ete áleisa yo.”

¹⁰⁸ Mwasi yango asengelaki kozala elembo. Ye asengelaki kozala elembo. Ezalaki mwasi yango kuna, azalaki na farini ekoki mpo na kosála mokáté moko, mpo ye ná mwana na ye bália yango. Molangi ekoki mpo na . . . Ná mafuta ekoki kati na molangi, mpo na kosála eloko ntango moke, mpo na kosangisa na yango. Alobaki: “Nayei awa mpo na kolokota nkoni mibale.”

¹⁰⁹ Na ntongo yango ya nsómo, molunge, oyo ebimisaka mapipi na loposo, ntango mobange mobali yango, elongi etonda na mandefu, suki ya pembe ekitá na mokongo na ye, ayáki wana, ná libandi na ye ezali kongenga, ayékámáki na ekuke, pe alobáki: “Yélá ngai mwa mai ya komela,” pe alobaki, “lisusu, yélá ngai eteni ya bilei na loboko na yo, mokáté.”

¹¹⁰ Alobaki: “Nazali na farini ya kokoka te. Nayei awa sikawa, kolokota nkoni mibale, mpo na kosalela mwana na ngai mwa mokáté. Nazali na oyo ekoki mpo na kosála bobele moko mpo na ye ná ngai. Tokolia yango pe tokokufa.”

¹¹¹ Alobaki: “Kobanga te, mpo ete, YANGO ELOBI NKOLO.” Oyo wana nde moto tosengeli na ye. Ezalaki te ete: “Sikawa, ekoki kosálema, ndeko mwasi. *Ekokoka* kosalema. Nayebi te.” Te, te. Eliya ayébaki ekosalema. “YANGO ELOBI NKOLO. Mbeki ekozanga farini te, molangi pe ekokauka te, kino mokolo Nzambe akotinda mbula na mokili.” Amen. Yango mpenza. Oyo wana esengeláki kozala elembo ekoki mpo na mwasi wana.

¹¹² Azali etaliseli ya lingomba lelo. Sima na Eliya kofanda esika na ye ntango moke . . . Azalaki na mwana moke ya mobali. Mwana yango abélaki. Bokono yango ezalaki makasi mingi kino azangaki mpéma kati na ye. Akufaki. Bongo asalaki

nini? Lingomba esila komona bilembo yango. Kasi, ezali nini, bobele ntango mwa kókóso eyáká, nokinoki, akolinga kopámela lingomba mpo na yango. Alingaki kopámela Eliya. Alobaki: “Yo moto na Nzambe, sikawa oyaki awa mpo na kokanisela ngai masumu na ngai pe kolongola bomoi ya mwana na ngai.”

¹¹³ Eliya azuaki mwana yango, amataki na likolo, kuna, esika azalaki kolálá, alálisaki ye na mbeto na ye, amilalisaki likolo na ye, alobaki: “Nkolo Nzambe,” Aleluya, “zóngisa bomoi ya mwana oyo.” Pe mwana yango alamukaki.

¹¹⁴ Akitaki na ye na nse. Mwasi yango atalaki mwana, na sima atalaki ye, na bongo ayebaki ete eloko moko ezalaki wana. Alobaki: “Mpo na likambo oyo, nayebi ete Liloba na Nzambe ezali na monoko na yo.” Amen. Azalaki elembo mpo na mwasi-mokufeli-mobali yango. Ntango amonaki nguya na Nzambe, Oyo apesaka bomoi to akoki koboma, kozongisa ebembe ya bebé na ye na bomoi, alobaki: “Mpo na likambo oyo, nayebi ete ozali moto na Nzambe.” Ayebaki yango.

Lelo oyo, bikólo elingaki koseka yango, ndenge basalaki na eleko wana. Bandimaki yango te. Kasi mwasi yango ayebaki ndenge mosusu. Ezalaki elembo na ntango wana, ndenge ye azalaki elembo, mpo na kosekwisa ebembe ya mwana na ye. Basakoli yango bazalaka ntango nyonso bilembo ya Nzambe.

¹¹⁵ Na bongo ntango Eliya asengaki mpo na kosukisa likambo, alobaki: “Soki Nzambe azali Nzambe, bósalela Ye. Soki Baála azali nzambe, bósalela ye.”

Lelo ekokaki kozala mokolo ya bikamwa mpo na Eliya, boye te? Soki politiki ezali nzambe, bósalela yango. Tozui eloko nini na politiki? Tosali nini? Tozui bobele ebelé na libebi. Tozui eloko moko te.

Kasi tobungisi pene na baninga nyonso, nyonso, oyo tozalaki na bango, bikólo mingi. Awa, na mpóso eleki, tobungisi koleka bikólo mibale to misato, oyo ekoti na comunisme. Tozali kofutisa bato mpako, kozua mbongo na bango, pe kotinda yango kuna, mpo na koleisa bato yango, baoyo bazali kokota na comunisme, bobele ntango bakómi malamumu. Ezali bokósi. Ezali solo.

¹¹⁶ Tolobaka ete tozali Baklisto. Na bongo, tózala lokola Baklisto, ezali te likambo ya koleisa bango biloko ya ndenge wana. Oyo wana ezali eloko moke oyo—oyo... Moto nyonso ya motema malamumu akokoka kosala yango. Oyo wana ezali kosambela. Ezali lobiko te.

Bato mingi babúlunganisaka kosambela ná lobiko. Kosambela ezali koleisa basi-bakúfélá-mibali ná babólá, pe bongo na bongo. Oyo wana nde kosambela. Kasi lobiko ezali Mbotama ya sika, kobotama mbala mibale. Ekeseni. Kosambela, Islam ezali kosambela. Kosambela ezali mingi.

117 Sikawa, likolo na Ngomba Karmele, mokolo oyo asengaki kosukisa likambo, abengisaki Akaba ná ba-nganganzambe nkóto na nkóto, baoyo bazalaki na témpelo ya bibongiseli na bango. Abengisaki bango likolo na Ngomba Karmele, alobaki: “Bómata awa. Bóya kokutana na ngai awa. Nakozala wana liboso na bango nyonso.” Asalaki nini? Azalaki na YANGO ELOBI NKOLO. Azalaki kobanga te. Alobaki: “Bópesa mbeka ya ngombe mobali. Bóbelela Baála. Tika ete Nzambe oyo akoyánola na móto ázala Nzambe.”

118 Na bongo, moi mobimba, kobanda ntongo kino sima na bilei ya mpokwa, bazalaki kopumbwa likolo na etumbelo. Bazalaki komizokisa. Babélélaki. Bagángaki makasi. Eliya azaláki kotámbola-tambola, alobaki: “Bóganga mwa makasi koleka. Ntango mosusu asali mobembo ya kolóbo mbisi, to eloko moko boye. Azali kolandela makambo, to eloko moko boye.”

Mpamba te, azalaki na YANGO ELOBI NKOLO. Azalaki komitungisa te. Azalaki na Liloba na Nzambe.

Ndeko mobali, ndeko mwasi, moto akoki kozala lisusu na mposa ya nini koleka elaka ya Nzambe? Nzambe alobaki ete Akosala yango. Ezali Abalahama. Amonaki ete Nzambe azali na makoki ya kokokisa likambo Asilaki koloba. Ayebaki ete Nzambe akokaki kosala yango, mpo Nzambe alobaki bongo.

119 Na boye a—na boye abengisaki bango, ete bámata kuna. Na bongo bazalaki komizokisa, koganga makasi pe kobélela moi mobimba, kino na mbeka ya mpokwa. Na sima, Eliya, bótala ndenge asalaki. Likambo ya liboso asalaki, ezalaki kosangisa mabanga zomi na mibale.

Nzambe azali ya kokabwana te. Bibongiseli ekaboli mangomba, kasi Nzambe te.

Moto moko alobi: “Ozali Moklisto?”

120 “Ngai nazali Batiste.” Na bongo, ezali mpenza lokola koloba ete azali ngulu.

121 Alobi: “Ngai nazali Methodiste.” Ee, ezali lisusu mpenza lokola ngulu, mpo na Nzambe.

122 Nalobi, ozali Moklisto? Mpo na kozala Moklisto, osengeli kozala lokola Klisto, kozala mongombo ya Bonzambe kati na yo, ná Molimo Mosantu, lokola ekitaki Mokolo ya Nkitélá. Ezali kotótómwa te, kasi nalingi koloba nkitélá ya solosolo. Bomoni? Malamu.

123 “Ngai nazali moto ya Nkitélá. Ngai nazali mo-Unitaire. Nazali—nazali mo-trinitaire. Ngai nazali...” Holala! Ezali mpenza lokola koloba ete ozali eloko mosusu. Ezali na ntina moko te mpo na Nzambe. Yango nde ekabolaka.

124 Yango nde likambo esalemaki kuna kati na bato-na- eklésia wana. Kasi Eliya asangisaki mabanga zomi na mibale wana, mpo

na kotalisa ete Nzambe azali bobele Nzambe moko likolo na bango nyonso. Asangisaki yango.

¹²⁵ Na bongo, ntango asangisaki yango bongo, abomaki ngombe mobali pe atiaki yango likolo na etumbelo, likolo na nkoni. Alobaki: “Sikawa, mpo na kondimisa ete mayele mabe ezali na likambo oyo te, báyela ngai mbeki zomi na mibale ya mai.” Pe asalaki ete mai ékota mpenza na nkoni yango. Oh, Aleluya! Alingaki kotalisa ete Nzambe azali Nzambe. Mpo ete, mpo na nini? Azalaki na YANGO ELOBI NKOLO. Azalaki mosakoli. Azalaki na Liloba na Nzambe.

¹²⁶ Na boye, mokolo yango, soki balobi ete bakobengana yo na lingomba, bakosala *boye*, to *ndenge mosusu*, soki obatisami na Nkolo na Yesu, ná makambo nyonso mosusu ya ndenge wana: bolémá. Ezali YANGO ELOBI NKOLO.

¹²⁷ Na mpokwa mosusu, moto moko malamú azalaki kosolola na ngai, ayaki kozinga ngai na maboko na ye, pe alobaki: “Ndeko Branham,” alobaki, “nalingi kotuna yo likambo moko.” Alobaki: “Soki okoki bobele kosala mwa mobémbano na makambo ya mpamba-mpamba oyo olobelaka.”

Nalobaki: “Nini?”

Alobaki: “Likambo oyo ya libatisi.” Alobaki: “Mangomba ya Chicago pe nzinga-nzinga bazalaka na mposa na yo makasi, kasi babángaka ete ólobela yango.”

¹²⁸ Nalobaki: “Na bosólo, nakolobela yango. Na bosólo mpenza, nakolobela yango.”

Alobaki: “Ee, ezali likambo se moko oyo batélemelaka yo.”

¹²⁹ Nalobaki: “Na bongo, batélemelaka ngai te. Ngai Moto nalobaki Yango te. Nzambe moto alobaki Yango. Nabeti ntembe na bango nyonso, báyá kotalisa ete ezali lokuta.” Bomoni?

¹³⁰ Alobaki: “Ee, omoni, bo—bosengelaki koyokana pe kosala boyokani na bandeko.”

Yango nde likambo balingaki ete ásala. Nzambe asáláka mobémbano te. Te, misie. Asáláka mobémbano te.

Alobaki—alobaki: “Sikawa, Ndeko Branham, nalingi kotuna yo likambo moko. Mwanje na Nkolo . . .” Alobaki: “Biso nyonso tondimaka Mwanje na Nkolo. Mwanje na Nkolo moto ayebisaki yo Bongo?”

¹³¹ Nalobaki: “Ata Mwanje na Nkolo alobi nini. Soki Ye, Mwanje na Nkolo, Akoloba *Bongo*. Kasi soki Alobaki likambo moko oyo ekeseni, Azalaki Mwanje na Nkolo te.” Nalobaki: “Ata Mwanje alobi nini, to eloko mosusu nyonso, Polo alobaki: ‘Soki Mwanje ya Likolo atei bino Nsango mosusu, tika ete álakama mabe.’”

¹³² Banje ná moto nyonso, eloko moko ya mosuni, oyo ebimbi na lolendo, koloba likolo na Banje. Joseph Smith, Brigham Young, ná binzambi-nzámbi mosusu nyonso, ba-Adventiste pe

mangomba mosusu nyonso, bamonaka makambo ndenge na ndenga ya bongo, kasi ekeseneke ntango nyonso na Liloba.

¹³³ Kasi Nzambe atátolaka Liloba na Ye. Ezali Liloba na Ye. Nalobaki: “Ezali Liloba na Nkolo. Na ntembe te. Nyonso oyo ngai nasili koyeba, Ye moto alakísá ngai yango. Nakótá naino na eteyelo ya líkindo to eteyelo moko boye te. Eutaka nde na Ye.” Nalobaki: “Soki ekesanaki . . . Soki ekesanaki na Yango, nalingaki kondimela Ye te. Mpo ete, Liloba na Nzambe esengeli kozala liboso. Makambo mosusu nyonso ézala lokuta.” Liloba na Nzambe, bókangama na Yango.

¹³⁴ Na bongo, Eliya, ntango asilisaki, amelisaki ba-nkoni yango nyonso mai, na mbeki zomi na mibale ya mai. Asopaki yango likolo na yango. Apusanaki kuna na kimia nyonso mpenza. Mpo na nini? Nzambe akoki kokosa te. Nzambe moto alobaki na ye. Alobaki: “Nkolo Nzambe ya Abalahama, Yisaka pe ya Yisalaele, tika ete éyévana lelo ete Ozali Nzambe, pe ngai nazali mosali na Yo. Ete nasali yango na etinda na Yo, mpo ezali YANGO ELOBI NKOLO. Nasali bongo mpo Yo moto oyebisaki ngai ete násala yango, mpo elongobani na Liloba na Yo. Tika ete bato éyévana sikawa ete Ozali Nzambe.”

Pe Móto ya Nzambe ekitaki, etumbaki mbeka, nkoni oyo emelaki mai, mabanga oyo ezuaki mai, pe biloko nyonso mosusu, pe ezikisaki nyonso. Na sima, Yisalaele bagángaki, bato nkóto nsambo: “Tika ete Nzambe ázala Nzambe.”

¹³⁵ Eliya, esengo boni, komona mwa mobange alembá wana, akóndá, na nzolóko nzoto mobimba, mwa língénda na loboko, mwa mbeki ya mafuta na mopanzi, alataki eteni ya mposo ya mpate. Ee, balingaki kobwaka ye na bolóko, lelo, soki atamboli na balabala; kasi bazali kotika basi balata ba-kupé; kasi, na ntembe te, balingaki kosala yango te, bomoni, ndenge wana, kobima libanda. Na bongo, kasi bayaki kuna. Bayaki wana, bakatisaki ngomba mpo na kokóma kuna, na língénda yango.

¹³⁶ Sikawa, Ngomba Karmelee ezali mwa—mwa esika moko ya mpamba te, kati na bilíki. Ezali ngomba monene. Ematá, lokola litúmu *boye*, ematá kino na sónge moko, pe etálaka mai-na-mbu na nse. Pe Eliya ná Gehazi bamataki likolo, kino na sónge. Pe kuna, Eliya akweyaki elongi na nse, pe abandaki kotómbola mongóngo epai na Nzambe, apesi mokongo na ye na ngámbo ya Wésti, kotála ngámbo ya moi. Mbula misato na sanza misato, ata mamwe ekweyaki te. Alobaki na Gehazi: “Kende kotala soki okomona eloko moko, lipátá kuna, likolo na mai-na-mbu.”

Atelemaki likolo na ngomba yango, kotálatala mosika *kuna*, alobaki: “Namoni eloko moko te.”

¹³⁷ Atikalaki bobele wana. “Nzambe, soki bato oyo babongoli motema, soki bato oyo bazongeli Yo, soki babelemi mpo na kotika bolémá nyonso wana pe bazongi na Liloba na Yo, na boye, Yo ozali Nzambe, mpo na koyanola na Liloba na Yo.”

138 Tika ete náloba ndenge moko lelo. Kamátá bibongiseli oyo pe búkábuká yango, bósana bokeseni ya bibongiseli oyo, pe sala ete bato bázonga na Liloba na Nzambe, na nzela oyo esémbolaka. Nakondimisela bino ete Nzambe moko azali, oyo akoki lisusu koyanola na nzela na Móto.

139 Tika ete bato básénga na Nzambe. Tika...?...básénga átinda moto moko. Tika ete bato básénga átinda mosakoli. Nzambe akotinda ye. Nazali kobéta ntembe ná bikólo ete bósala yango. Bókweya bilongi na nse pe bósenga na Nzambe, ete átinda mosikoli, pe bótala likambo nini ekosalema. Bómeka naino kosala yango, Nzambe akoyanola. Nzambe asalaka yango ntango nyonso.

140 Afukamaki pe alobaki: “Nzambe, tika ete ésalema lelo. Bato oyo bazaláká kotelemela Yo. Bato oyo basili kokabwana na bibongiseli ya ndenge na ndenge. Kasi, lelo, Yo Moko osili komitalisa. Ozali Nzambe. Pe bato balobaki: ‘Bóbwaka Baála.’ Pe nasili koboma nkóto na nkóto na ba-nganganzambe yango. Basili kolongolama sikawa, Nkolo. Mabaku nyonso esili nye, bipekiseli mike-mike oyo ekabolaki biso.”

Mo-metodiste akosepela koya kosambela elongo na mo-Batiste; mo-Batiste akosepela koya elongo na bato na Nkitéla; baoyo bazali sembo na mitema kuna, bandimi nkóto nsambo wana. Kasi bakoki kosala yango te. Soki basali yango, bakobengana bango na mangomba. Bamosusu na bango bazali na ntina na yango te. Bakoya, ata ndenge nini. Ezali solo.

141 Kasi bótika bango nyonso bábuka makanisi wana, básangana pe báloba: “Tokobósana bindimeli nyonso oyo, ba-katekísimo ná makambo nyonso oyo totángaka. Tózonga na Liloba ya Nkolo.” Bokomona likambo nini ekosalema na ntango wana. Nzambe akopesa bango mosakoli, na ntembe te, Akotlemisa ye oyo akomemela bango Yango mbala moko, soki babélémi mpo na koyamba Yango. Basengeli liboso kobondela. Nzambe azali kozela.

142 Ezali kokamwisa te ete Nzambe alingaka ete bato bázala kati na likambo yango? Ntango Yesu abwakaki miso na elanga, Alobaki: “Mbumba na elanga eteli. Basali bazali mingi te. Bóbondela Nkolo na elanga,” ezalaki Ye. “Bóbondela Ngai, mpo Nátinda basali na elanga na Ngai.” Ezali na eteni ya mosala oyo bosengeli kosala. Nzambe azali kozela ete Lingomba na Ye ébélela Ye. Asalaka ntango nyonso bongo. Lelo, Nzambe azali kozela ete bato básénga mpo mosali na Ye ábanda mosala. Pe mosali akoki kobanda mosala te soki bato babondeli te.

143 Kuna, Yisalaele akokaki kobanda mosala te, ná bilembo pe bikamwa, soki bakweyaki bilongi na nse te mpo na kobondela kosenga mosikoli. Nzambe azaláki na mosikoli na Ye. Nzambe azaláki na mosakoli oyo azalaki kozela kuna na bilíki, abátelaki ye kuna mibu ntuku minei, kozela ete bámilengela, bábondela.

Kasi ntango bamilengelaki pe babandáki kobóndela, na ntango wana Nzambe atindaki mosikoli.

Nzambe akosala ndenge moko lelo, soki bato bakoki kosangana, kobanda kobondela. Malamu.

144 Azalaki elembo mpo na basakoli yango ya lokuta pe mpo na Akaba, mpo azalaki mosali ya Nzambe. Azalaki mosakoli ya Nzambe. Na sima, azalaki pe elembo mpo na Yisalaele, mpo akokaki kokanga likolo to kofungola likolo, na ntango alingaki. Sólo, azalaki yango.

Bólakisa ngai moto oyo akoki kokanga likolo, bólakisa ngai moto oyo akoki kofungola likolo, libanda na Nzambe. Pe Liloba na, Nzambe, Liloba na Nzambe ezalaka ná basakoli.

145 Mika, elembo mpo na Yosafata. Mika azalaki elembo mpo na Yosafata, ete Nzambe abátelaka mosakoli ya solo na loboko.

146 Sikawa botala. Azalaki na basakoli nkama minei, Akaba, pe abengisaki basakoli yango nkama minei. Pe bango nyonso na monoko moko balobaki na ye. Ata bongo, na bozindo na motema ya Yosafata, moto na Nzambe, ayebaki ete likambo moko ezalaki kotambola malamau te. Ayebaki ete likambo moko ezalaki kotambola malamau te. Alobaki: “Ozali na moko mosusu te?”

147 “Sima na bato nkama minei kozala wana?” Alobaki: “Baoyo nyonso bazali basakoli, basakoli na Yaweh.” Ezali ba—ba—Methodiste, ba—Batiste, ba—Presbiterien, ba—Unitaire, oh, holala, holala, ba—trinitaire pe lolenge ndenge na ndenge. “Tozali na bango nyonso awa, pe na mokoko moko balobi ete oyo ezali ekólo ya monene koleka. Tozali na eloko ya kobanga te.” Ezali lokola mwana moke kobeta piólóló ezali ye koleka na malíta, boyebi, ntango oyo azali kobanga. Bómitungisa mpo na yango te.

Alobaki: “Kasi ozali na moko mosusu te?”

Alobaki: “Oh, iyo, mosusu azali awa, kasi,” alobaki, “nalingaka ye te.” Bomoni? Alobaki: “Alobaka ntango nyonso mabe mpo na ekólo oyo. Alobaka ntango nyonso ete likambo ya mabe ekokómela biso.”

148 Yosafata alobaki: “Nako—nakosepela koyoka ye.” Oh, iyo!

Azalaki nini? Elembo. Ata mangomba to bibongiseli ezali boni, Nzambe azalaka ntango nyonso na mosakoli oyo akangamaka na Liloba.

149 Yosafata ayebaki ete Akaba asilaki kokweisama, mpo mosakoli ya solo, Eliya, oyo azaláká elembo mpo na ekólo, alobáká: “Ba—mbwa ekoléta makila na yo, ekokóma awa.” Ezali solo. Ayebaki ete likambo yango ekokómela bango, ye ná Yezabele. Ayebaki ete ekosalema. Bomoni?

150 Pe Mika, Mika alobaki. Bakendeki epai na ye pe balobaki: “Sikawa, yóka, soki olingi kokota na lisanga oyo ekoya, yóka likambo ya kosala. Ndimba ete batei nyonso oyo balobi solo.

Omoni? Yebisa ye: ‘Bókende kuna.’” Pe balobaki: “Yo ndima kaka.” Balobaki: “Yoka likambo tokosala. Tokosala . . . Tokosala nyonso mpo ókota na ebongiseli na biso, soki bobele osali yango, omoni, soki bobele osali mobémbano awa na mwa makambo mosusu oyo olobelaka. Talisa bobele, kende koyokana na bango, kóba elongo na bango.” Ha-ha! Bokoki kokanisa ete mosakoli ya solo ya Nzambe kobima libanda na Liloba na Nzambe? Bongo te?

“Ee,” bato yango balobaki, “kasi, tomonaki emononeli,” basakoli nkama minei wana. “Toyebi. Tozali basakoli. Toyebi, mpo tozali basakoli.”

¹⁵¹ Mika alobaki: “Natii ntembe te ete bomonaki emononeli. Natii ntembe ata moke te, ete bomonaki emononeli, kasi elongobani na Liloba yango te.” Amen. Alobaki: “Ngai pe namonaki emononeli.” Amen. Oh, mawa! Azalaki elembo. Azalaki elembo. Alobaki: “Namonaki emononeli, pe namonaki Yisalaale, lokola bampate bazangi mobateli, bapalangani likolo na ngomba.”

Pe moyangeli mokonzi yango, episkopo, abélémaki pe abetaki ye mbata na monoko. Alobaki: “Molimo ya Nzambe ekendeki wapi ntango elongwaki na ngai?”

¹⁵² Alobaki: “Okomona ntango okozala na boloko. Okomona.”

Ye, Akaba alobaki: “Bóbwaka moto yango na boloko. Boleisa ye mápa ya bolózi, pe bópesa ye mai ya bolózi, mpo na komela.” Alobaki: “Ntango nakozonga na kimia,” alobaki, “ntango wana nakotála likambo na ye.”

¹⁵³ Mobange Mika azalaki wana ná YANGO ELOBI NKOLO. Alobaki: “Soki ozongi mpenza, Nzambe asololaki na ngai te.” Hm! Yango mpenza. Azalaki nini? Azalaki elembo, ete basakoli na Yaweh, basakoli ya Nzambe bakangamaka na Liloba na Nzambe.

¹⁵⁴ Soki bozali na mosakoli oyo alobaka ete bosengeli kobatisama na bibiangelo ya “Tata, Mwana, Molimo Mosantu,” ezali mosakoli ya lokuta. Soki bolobi ete mosakoli moko azali kati na bino, oyo alobaka: “Ba-Nzambe bazali misato,” ezali mosakoli ya lokuta. Likomi ata moko te ezali mpo na yango. Ezali solo. Kasi mosakoli ya solo ya Nzambe akokangama na Liloba yango. Pe soki emononeli na ye ekeseni na Liloba yango, azali mosakoli ya solo longwa na Nzambe te.

¹⁵⁵ Ata esika moko te, na Biblia, moto moko te asílá kozua libatizi na bibiangelo ya “Tata, Mwana, Molimo Mosantu.”

¹⁵⁶ Bótala Polo, kuna na boloko, mwa Moyuda moko, ya zólo egumbámá, ná libandi, ezalaki ye kuna, asalaki mibu ntuku mibale na boloko ya ba-Roma. Akomaki mikanda oyo. Sikawa, bokanisi ete basi batei bakanisaki nini mpo na Polo, ntango alobaki: “Tika ete basi yango báfanda kimia na ba-losambo.

Napesi bango nzela ya koteya te”? Nakanisi ete bakokaki mpenza kosilisa ye loposo.

Bokanisi ete ba-episkopo yango bakanisaki nini, ba-episkopo yango, ntango bazalaki koloba makambo ndenge na ndenge nyonso wana? “Tika likambo *boye*, likambo *boye*, pe makambo *boye* na *boye*? Polo? Yebisa ngai, ata bongo, ye azali nani mpenza, ye oyo abwakami kuna na boloko?” Kasi asilaki kokutana na Yesu. Ayebaki makambo azalaki kolobela.

Pe kati-kati na etónge yango moko, sima na liwa ya Polo, sukasuka basalaki, longwa na etónge wana ya ba-episkopo pe bato minene, kino na Likita ya Nicée, bango nde babandáki lingomba Katoliko, batángwaki na Liloba na Nzambe. Kuna nde likambo ya “Tata, Mwana, Molimo Mosantu” ebandaki. Nabeti ntembe na moto nyonso, bisika nyonso, bikólo nyonso, mpo na kotálisa ngai bokeseni na yango.

¹⁵⁷ YANGO ELOBI NKOLO. Libatisi ya kosalela ebiangelo ya “Tata, Mwana, Molimo Mosantu” ezali lokuta. YANGO ELOBI NKOLO. Napesi mitindo na moto nyonso kati na bino, oyo azali awa to akoyoka bande, oyo abatisami te na Nkombo na “Yesu Klisto,” ábátisama lisusu na Nkombo na Yesu Klisto.

¹⁵⁸ Polo, na Misala, 5:9, to, 19:5, alobaki: “Bozuaki Molimo Mosantu sima na bino kondima?”

Balobaki: “Toyebi te soki Molimo Mosantu moko ezalaka.”

Alobaki: “Na bongo, bobátisamaki na nini?”

¹⁵⁹ Balobaki: “Tobátisamaki,” kasi na libatisi ya Boklisto te.

“Tata, Mwana, pe Molimo Mosantu” ezali libatisi ya Boklisto te. Ata Moklisto moko te asílá kobatisama ndenge wana, na Biblia to na mibu nkama na nkama sima na Biblia. Ezali endimeli ya ba-Katoliko, kasi ezali Malakisi ya Boklisto te. Bolakisa ngai na Biblia. Ezali—ezali kobúba. Ezali misala ya milimo mabe.

Nalingi koloba te ete bato oyo babatisámá ndenge wana bazali bongo. Nzambe azali na bato mingi kuna lelo, baoyo bayebi yango makambo malamumu mpenza te.

¹⁶⁰ Kasi, ngonga esili kokoka, tosengeli kozonga na Liloba soki tolingi ete Nzambe ákoka kosala lelo ndenge Asalaki na ntango wana.

¹⁶¹ Nayebisaki mama na ngai ntango akómaki pene na liwa, liboso na ye kokufa. Nalobaki: “Mama, ntango nakómaki Moklisto, lokola mwana moke, nabandáki kolukaluka mpo na koyeba. Nayebaki ete Nzambe azali, longwa na bimononeli oyo oyebi, ná makambo oyo esalemaki na bomoi mobimba.” Nalobaki: “Na sima, namonaki ete lingomba Katoliko elobaki: ‘Biso nde lingomba. Ezali na ntina moko te makambo Biblia elobi. Tondimaka ete Ezali malamumu, kasi, biso tozali lingomba. Likambo tolobaka, Nzambe akangaka yango na Likolo.’ Na

boye, na sima, basalelaka yango *boye*. Ezali nzoto moko. Ba-Luterien balobaki: ‘Bazali na libunga. Bisó tondimaka yango *boye*.’ Ba-Batiste balobaka: ‘Bango nyonso bazali na libunga. Bisó tondimaka yango *boye*.’ Pe ezali na ba-nzoto nkama na nkama.”

Ee, ndenge nini bokoki kozala na kondima? Nani kati na bango azali na solo? Ezali bobele na Eloko moko ya solo. Nayebaki Yango te ntango wana.

¹⁶² Nalobaki: “Mama, nazongaki na Biblia pe namonaki lolenge nini bantóma yango ya ebandeli, lolenge ya lingomba nini bazalaki na yango, lolenge nini bateyaki, pe makambo basalaki. Nasalaki yango mpenza ndenge bango basalaki yango, ndenge Biblia elobaki, pe nazuaki mbano yango moko.” Amen. Bólimbisa elobeli oyo, kasi ba—bayebaka elengi ya eloko soki oléi yango. Ezali solo. Nazuaki mbano motindo moko na bango. Iyo.

¹⁶³ Na bongo, bokoki kotia motema te na eloko oyo ezali na lolenge nkama mwambe ekeseni, lolenge *oyo boye* pe lolenge *oyo kuna*.

Na sima namonaki, na Biblia, ete Yesu Ye moko alobaki: “Moto nani akozua Liloba moko ya Buku oyo, to akobongola Yango; moto nyonso oyo akobakisa eloko moko na Yango, to akolongola eloko moko na Yango; eteni na ye moko ekolongolama na Buku ya Bomoi.” Elakisaki ete nkombo na ye ekomamaki kuna, toboi te, kasi ekolongolama. Oh!

¹⁶⁴ Tosengeli kozonga na Liloba oyo. “Likolo ná nse ekoleka, kasi Liloba na Ngai ekokweya ata moke te.” Iyo, misie. “Tika ete liloba ya moto nyonso ézala lokuta. Oyo ya Ngai nde solo,” ndenge Yesu alobaki. Tókangama na Liloba. Iyo. Oh, holala! Iyo.

¹⁶⁵ Yosafata ayebaki ete Nzambe abatelaka mosakoli ya solo, ya solosolo oyo akangamaka na Liloba na Ye pe asalaka mobémbano te. Te, misie.

¹⁶⁶ Akangamaki na Yango. Nkama minei batelemelaki ye, ná masakoli na bango pe. Kasi oyo ya ye ezalaki Liloba na Nzambe, ná bilembo pe nyonso wana.

Pe nalobi, lelo, eloko tosengeli na yango lelo ezali moto moko, mosakoli, oyo akotelema kati na biso, oyo akokangama na Liloba na Nzambe ata moto mosusu alobi nini, to ata ebongiseli elobaki nini.

¹⁶⁷ Mika ayokanaki na moto moko te. Mose ayokanaki na moto moko te. Nowa ayokanaki na moto moko te. Ata moko te na kati na bango ayokanaka na bato. Bango nyonso batelemelaki bango. Kasi bazalaka bilembo na mikolo ya mabe, liboso Nzambe átinda kosambisama. Pe Nzambe abátelaka Liloba na Ye pe Alingaka ete bato na Ye bátósa Liloba na Ye. Nkembo na Nkolo.

Sikawa, tobandi kokóma pene na kosukisa, na mwa miníti moke sikawa. Sikawa boyoka na bokébi.

¹⁶⁸ “Moto moko atindamaki na Nzambe, nkombo na ye Yoane,” elembo-mosakoli. Liboso mpenza na Yesu koyá na mokili, mpo na komitalisa Ye moko, Atindaki mosakoli liboso na Ye. Asalaki nde bongo? [Losambo balobi: “Amen.”—N.D.E.] Atindaki mosakoli, Eliya ya Kondimana ya Kala, esakolamaki ete akoya na nguya ya Eliya ya Kondimana ya Kala. Asengelaki kozala elembo-mosakoli ete Yesu azali koya, ete Masiya asengeli koya.

¹⁶⁹ Pe Yoane abimaki na bilíkí, azalaki elembo, ete Masiya Azali na nzela. Ntango Yoane amonanaki, Yisalaele asengelaki koyeba yango, na nzela na basakoli na bango.

Wana nde esika balekaka pembeni na yango. Bandimaka basakoli na bango te. Bandimaka te. “Biso tondimaka te ete makambo Petelo alobaki Mokolo ya Nkitéla ezalaki solo.” Bandimaka te ete ezali solo. Bandimaka te makambo Polo alobaki, makambo moko oyo Petelo alobaki. Alobaki: “Soki Mwanje auti Likolo atei liloba mosusu, álakelama mabe.” Bango bandimaka yango te. Bomoni? Bandimaka yango te.

Bandimaki pe basakoli na bango te. Soki báyebaka, balingaki koyeba ete Yisaya alobaki: “Mongongo ya moto moko ekogánga kati na bilíkí, yango nde ekobongisa nzela liboso na Nkolo.” Basengelaki koyeba yango. Azalaki mosakoli, moto monene kati na basakoli. Alobelaki bango, kasi bandimelaki ye te. Te, te. Alobaki: “Masiya azali koya.”

¹⁷⁰ Moto yango azalaki moto atindami na Nzambe. Oh, bandeko! Bato ya kolanda ye bazalaki te. Nzambe apesaki ye bato ya kolanda ye, etóngá moké, ndenge Asalaki mpo na Eliya. Nzambe apesaki ye bato ya kolanda ye. Azuaki bango na ebongiseli moko ya politiki te. Ateyaki Liloba, atelemaki ngwi na Liloba na Nzambe, pe Nzambe apesaki ye etóngá moké. Eliya atelemaki ngwi na Liloba na Nzambe. Nzambe apesaki ye etóngá moké.

¹⁷¹ Moto oyo ayokanaki na bato te. Azalaki na bato ya kolanda ye te, na boyokani moko te, azalaki moto ya ebongiseli moko te, asengaki eloko moko te pe abangaki eloko moko te. Ezalaki Yoane. Mpo na nini? Azalaki moto atindami na Nzambe. Yango ntina atelemaki ngwi. Azalaki Eliya mpenza oyo atelemaki wana, mpo na kondimisa bato ete Masiya azali koya. Alobaki: “Nazali mongongo na ye oyo azali kogánga kati na bilíkí, ndenge mosakoli Yisaya alobaki. Bómibongisa mpo na kokutana na Nkolo.”

¹⁷² Bafalisai ná Basadukai yango bazalaki wana pe bazalaki koswána mpo na bilambá na bango pe makambo mosusu. Bobele ntango bazalaki koswana pe kowélana mpo na yango, kati-kati na bango mpenza, Masiya ayaki, azalaki kotambola.

173 Yoane alobaki: “Bótala, Ye wana.” Aleluya! Bótala ye. Atalisaki Ye. “Ye wana. Azali kati-kati na bino sikawa.”

Pene na ntango wana, likolo engulumaki. Yesu akotaki na mai. Pe Yoane atitolaki ete amonaki Molimo ya Nzambe, lokola ebenga, kokita. Mongongo moko egángaki: “Oyo azali Mwana na Ngai molingami, Nasepeli kofanda kati na Ye.” Holala, Holala!

174 Yoane alobaki: “Sikawa ngai nasengeli kokita. Ye akomata.” Oh, oyo mosakoli nini, elembo mpo na Yisalaele! Iyo, misie.

175 Azalaki moto atindami na Nzambe, ata tata na ye azalaki nganganzambe. Oh, iyo. Tata na ye, Zakari, azalaki nganganzambe. Kasi bomonaki yango? Nzambe alingaki te ete mosakoli yango ásangana na bibongiseli na bango. Tata na ye alingaki komema ye na eteyelo na bango ya líkindo, na ebongiseli monene *Songolo*, kokómisa ye motei malamumu, boyebi, kokótisa ye kelasi mpenza, pe kopésa ye makambo kílíkili oyo asengelaki kozala na yango te. Kasi Nzambe alingaki te ete bosoto wana ébébisa molimo na ye. Bozali kososola? [Losambo balobi: “Amen.”—N.D.E.] Akokaki kotika te ete moto yango ásangana ná bibongiseli. Azalaki moto ya moko na yango te, binzambi-nzambi moko te, Bafalisai, Basadukai, Baelode, to nyonso oyo ekokaki kozala. Nzambe apesaki yango nzela te.

176 Mbotama na ye ezalaki ndenge mosusu. Azalaki mwana moko ndenge mosusu. Azalaki mosakoli. Papa na ye azalaki nganganzambe, kasi Atikaki te ete ásangana na bakósi nyonso wana, losambo ya Bafalisai pe nyonso wana. Asalaki nini? Amemaki ye kuna na bilíki pe Akotisaki ye kelasi kati na bilíki.

177 Kelasi malamumu nini oyo! Amen. Akotisaki ye kelasi na kobikela makambo. Yangu nde eleki malamumu, koyeba Nzambe. Ntango abimaki, ayebaki mpenza etínda na ye malamumu. Nzambe atitolaki etínda yango.

Atitolaki yango esika nini? Na ebale. Sikawa, soki bokoki kosukisa likambo. Bomoni? Na ebale!

Alobaki: “Nazali mongongo na ye oyo azali kogánga na bilíki: ‘Bóbongisa nzela ya Nkolo, bósémbola nzela na Ye.’”

178 Yoane, moto atindami na Nzambe. Nzambe atikaki te ete bosoto wana ébébisa ye. Akotisaki ye kelasi na bilíki, Nzambe. Akotisaki ye kelasi na biteyelo na bango te, na líkindo na bango te. Soki Ásalaka bongo, alingaki kozua malakisi na bango ya mpamba-mpamba oyo bozuaka na biteyelo ya lelo, biteyelo ya ndenge na ndenge. Ezali bobele ba-Presbiterien te, ba-Batiste ná ba-Methodiste, kasi biteyelo ya ba-Pantekotiste, ezali mabe ndenge moko, biteyelo nyonso ya líkindo, ezali kobimisa bango na yango. Oh!

179 Boyei na ye, Molimo ayebisaki Yisaya. Boyei na ye, boyei na Yoane, esakolamaki na Makomi. Yisaya 40:3 elobi. “Nakotinda motindami na Ngai liboso na Ngai, bóbongisa nzela,” to, ezalaki

Malaki 3. Elobaki, Malaki 3 elobaki ete: “Akotinda motindami na Ye liboso na Ye.” Mosakoli, mosakoli ya suka, alobelaki ye. Likambo ya suka elobami mpo na ye. Bómikanisela, Buku ya suka ya Kondimana ya Kala elobaki ete Eliya akoya mpo na bana ya Yisalaele, liboso Masiya ámonana.

¹⁸⁰ Bosili kobéléma? [Losambo balobi: “Amen.”—N.D.E.] Buku ya suka na Biblia, Emoniseli, etalisi biso ete akozóngá na ntango ya suka, mpo na lingomba ya Mabota, elembo. Bazali koleka pembeni na yango! Esakolamaki ete akoya lisusu, liboso na Boyei monene pe ya mibale ya Nkolo. Na Mal- . . . Na Malaki mokapo ya 4, na Emoniseli pe, mokapo ya 3, elobi na biso ete akozala awa na mikolo ya suka. Ye moko wana, akotelema na kati-kati mpo na bato, ná etóngá moké oyo Nzambe akopesa ye, akoya na mikolo ya suka. Nzambe alobaki bongo. Akozala elembo mpo na ekólo ya Mabota, ete ntango na ye esili.

¹⁸¹ Pe, bómikanisela, ntango akomonana, ntango ekómi pene. Tóbondela mpo Nzambe átinda ye. Ntango ekómi pene.

¹⁸² Bobele ntango mosala na ye esilaki, Masiya Amitalisaki. Bobele ntango moto monene oyo akoya na mikolo ya suka, akosilisa lotómo na ye, Masiya Akomitalisa. Ekozala bongo. Ntango ekómi pene, na bongo ekozala malamú ete tóbondela. Ekozala malamú ete bóbanda kobondela.

¹⁸³ Elembo na Ye, epesami-na-Nzambe na eleko oyo, ekondimisa nini ye azali. Moto nyonso akoyeba yango. Nzambe akotatola yango. Akotalisa bilembo pe bikamwa oyo esalémá naino na mokili te, na nzela na yango. Nalingi koloba te kominilisa, kolénga, pe koloba minoko ya sika. Akosungama na Liloba na Nzambe, lokola moto oyo. Mpo na nini? Koya na ye esakolamaki, na Malaki 4 pe Emoniseli 3, na bongo, akoya. Eloko moko te ekopekisa ye; akoya. Amen. Akozala awa. Amen. Tika ete bato bákweá bilongi na nse lelo pe bábanda kolelela Nzambe, pe bótala likambo nini ekosalema. Bokomóna ye komonana na nguya. Iyo, misie.

¹⁸⁴ Kokokana na Makomi, Nsango-elembo na ye ekozala “bozongisi”. Eloko nini ekozala ye. . . Tokoyeba ete azali nini? Ndenge nini tokoyeba ete ezali mpenza ye?

¹⁸⁵ Boyebi, mokolo moko Yisalaele atunaki bongo, na Dutelonome, mokapo ya 20. . . molongo ya 20, nakanisi. Alobaki: “Ndenge nini tokoyeba ete ezali mpenza ye?”

Tokoyeba ndenge nini? Nzambe ayebisi biso ete tokoyeba ye. Akosala nini? “Akozóngisa mitema ya bana na Nsango ya solosolo ya Pantekote na ebandeli.” Holala!

¹⁸⁶ Elembo oyo etiolami, elembo ya solosolo, kasi baleki pembeni na yango. Basalaka bongo ntango nyonso.

¹⁸⁷ Kozonga na Lingomba ya solo, Nsango ya solo! Akozala wana ye moko kotelemela ebongiseli, akozala na mpiko pe

akobanga te, ná YANGO ELOBI NKOLO. Akosala mobémbano na ebongiseli moko te. Akozala na likambo moko te ya kosala na yango; akomemama ata na likambo moko te. Akotelema mpenza ngwi na Liloba, YANGO ELOBI NKOLO. Nzambe akotatola lotómo na ye na bilembo pe bikamwa, komonisama monene ya Liloba, pe akopesa yango na bato. Ezali mpenza mokolo monene pe ekómi pene! Lokola. . . Akotelema lokola Petelo ná Yoane, sima, na Mokolo ya Pantekote.

Sima na Pantekote, batondisamaki na Molimo Mosantu, babatisamaki kuna, bazalaki na esambiseli ya Koyangana. Bazalaki kuna na mpiko na bango nyonso. Bongo, balobaki: “Topekisi bino kotéya lisusu na Nkombo na Yesu.”

¹⁸⁸ Alobaki: “Ezali malamú ete tótósa bino, to Nzambe? Bómisambisa bino moko, baínga, batángá te.” Amen. Bazalaki basakoli. Bazalaki basakoli bapakolami na Nzambe. Bazalaki bilembo ya Molimo Mosantu. Bazalaki basakoli. Bayebaki.

¹⁸⁹ Bazalaki lokola Yoane. Basilaki koleka na Pantekote pe basilaki komona eloko moko.

Bazalaki te lokola mingi na batei na biso ya lelo, lofúndo, loléndo mpo na ebongiseli monene oyo tozali na yango, bato boni bazali na bitóngá minene na biso. “Biso tozali ebongiseli ya monene. Tosalaka mosala monene ya kopanza nsangomalamu.” Oh, mawa. “Oh, biso tosangisaka bato ebele koleka bango nyonso.” Ezali nini? Ezali kobendama ya politiki. Nalingi ete bóyoka na bokebi, na miníti mibale to misato ekolanda. Kobendama ya politiki.

¹⁹⁰ Na ntembe te nasili koloba likambo moko, eleki miníti moke, boyebi likambo nazali kolobela. [Losambo balobi: “Amen.”—N.D.E.] Elembo oyo esakolamaki. Natikaki yango, natiaki yango na mabólóngo na bino. Bomoni? Ee, bobele mpo na bino bozali awa te, kasi mpo na baoyo bakoyoka. Ezali na mabólóngo na bino. Bósala na yango nyonso bolingi. Bóbondela, pe bokomóna Nzambe kokóta na mosala. Bokomóna Ye kokokisa Liloba na Ye. Azali kozela.

¹⁹¹ Ezali ntango ya ba-bombe atomique, pe bato bazali kobanga. Na Pentagone, bayebi eloko ya kosala te. Ná bilembo eyebani te na likolo, ba-soucoupe volante, ná makambo nyonso oyo Nzambe alobelaki liboso. Ntango ekoki mpo Eliya yango ámonisama, (azali esika moko).

¹⁹² Tika été bato, tika été etóngá moke yango, bato moke oyo Nzambe akopesa ye, tika été bato moke yango bábanda kobelela Nzambe, pe bótala likambo ekosalema. Ekosukisa likambo na ekólo mobimba. Ekozala nguya oyo bamóná naino te. Likambo ezali ete, mbala oyo, ntango ekosila koleka mpo na bango, na ntango wana. Bikuke ekokangama. Na bongo, bóbosana te, tozali na ntango ya suka. Bóbondela.

193 Bótala eloko tozali kobenga lotómo lelo. Tozali na eloko nini? Sikawa, mpo na kosukisa, nalingi koloba boye. Tozali na eloko nini? Tozali na eloko moko te. Bakambi na biso mosusu ya minene koleka, ba-evangeliste na biso ya minene koleka; moko na ba-evangeliste na biso ya minene alobaki: “Soki nakoki komona bandimi na ngai zomi likolo na mokama, kotelema ngwi, mobu mobimba, nakozongisa matondi mingi.” Na ntango oyo, ata moko te ozongaki sima, na baoyo Finney azalaki na bango ntuku libwa na nsambo likolo na mokama.

Polo azalaki na mokama, koleka nkama, nkama koleka nkama. Moto moko abikisamaki, pe, atondisamaki mpenza, ndeko mobali, akendeki koyebisa moto mosusu; pe ayebisaki moto mosusu; pe ayebisaki moto mosusu; ekómaki na ba-milió. Mpo na nini? Bazalaki na eloko moko. Batélélaki na Liloba.

194 Lelo tozali bobele kokanisa mpo na ebelé ya bato. Ezali nini? Ezali ebongiseli ya politiki. Soki toyei, evangeliste moko monene ayei na engumba, eloko nini eyaka liboso? Ebelé na bato, soki ba-Methodiste nyonso, ba-Batiste, ba-Presbiterien, bango nyonso. Bakosala boyokani na mwa makambo, ete: “Akoki koteya bobele oyo, kasi akoki koteya oyo kuna te. Pe akoki koteya oyo te, kasi akoki koteya oyo kuna.” Bozali na eloko nini?

195 Pe, bakomatisa kuna, basi. Nazali kolobela ba-Pantekotiste. Basi bakomi kuna, kino na etumbelo, bazali kokóba kolobelana.

196 Natélémelaka ntango nyonso likambo ya kobenga bato na etumbelo. Ekozala malamú náloba yango. Nandimaka yango te. Na Biblia, likambo ya ndenge wana ezali te. Ndenge nini moto akoki koya soki Nzambe abengi ye te? Bokoki kopekisa ye ata moke te. Bozali na ntina ya kobenga eloko moko te. Nzambe asili kobenga ye. Kobenga na etumbelo ezali likanisi ya ba-Methodiste. Ezali solo. Kobenga na etumbelo, bakangaka bango, kolobaka: “Yoane, oyebi, mama na yo akúfá kálá.”

197 “Uuh-uuh-uuh, iyo, ndeko, uuh-uuh!” Oyo wana ezali kobongwana te.

198 Awa, eleki ba-mpokwa moke, likambo moko etalisamaki na Louisville, na mwasi oyo bamemaki kati na sanduku, batiaki ye likolo ya estrade na esika ya mandóki. “Bato nkama na nkama,” elobamaki, “bakendeki na etumbelo.” Nsango-malamu ezali likambo ya kobangisa bato te. Ezali koyokela moto mawa te. Ezali kobongwana ya kondimisama.

199 Bótala malamú mayangani oyo, ba-evangeliste minene oyo, pe ata na lotomo moke ya komikitisa na ngai, namitii pembeni te. Ntango mosusu nayokaka mwa nsoni mpo na kobima. Ezali solo. Tosengeli kosala nini? Kotelema, kobenga bato na etumbelo pe kondimisa bango. Bana mike ya basi bakoya wana, pe bango nyonso bazali kolia bazooka, koloba: “Bomoni? Bomoni? Nakei. Ah-ha.” Basi oyo bakoya kuna, ná suki bakátá pe bilongi bapakólá-pakólá, ba-Pantekotiste, bakoya wana, pe bakobima,

pe bakoloba ete balobaki minoko ya sika. Batikaka suki na bango kokóla te, pe bazali kokóba kosala makambo yango moko bazaláki kosala. Bokoloba na ngai ete yango nde kobongwana? Ezali nde koseka Nzambe. Biblia elobi: “Ezali lisumu pe nsoni mpo na bango kokátá suki na bango.” Ndenge nini mwasi oyo azali na suki bakátá akoki kopámela mwasi oyo apakoli bikelakela na elongi? Ekozala malamú koyóka yango. Ntango ezali koya, oyo epasola ekotiámá na mosisa ya nzete. Pe nzete nyonso oyo ekobóta mbuma malamú te ekokátama.

²⁰⁰ Likambo ezali nini? Ezalaki mabe. Mpo, na batei na biso ya mikolo oyo, ya *maloba*, ná bitóngá minene, batóndá na loléndo. Bibongiseli bayebi Nzambe te, lokola Hottentot oyo ayebi butu ya Ezipito te, ntango eyaka. Bakendeke kuna . . .

²⁰¹ Bongo soki bato oyo bazalaki kuna na Pantekote, balobaki: “Sikawa, Yesu atindaki biso ete tómata awa pe tózela kino tokozua nguya longwa na Likolo. Sikawa, bandeko, tosili kokokisa mikolo libwa awa. Tóyamba yango, na kondima. Sikawa, tozali na Molimo Mosantu. Tóbima libanda, mpo tosili kozala awa. Tosili kosala likambo Yesu ayebisaki biso kosala?” Babikeláká naino ata likambo moko te.

²⁰² Bótika náyebisa bino likambo moko. Nayebi ete ezali kotiana na bande, kasi boyoka yango, ata bongo. Boyoka. Nakoyebisa bino likambo moko. Ezali nsoni. Bato bazali komeka ko . . . Nandimaka ata moke te ete Molimo Mosantu ezali “koningana”. Nandimaka ata moke te ete Molimo Mosantu ezali “ndanga ya koloba minoko ya sika, to kolela, to kogánga.” Oyo wana ezali kotótómwa ya nzoto. Nandimaka ete Molimo Mosantu ekoki kosala yango. Kasi Molimo Mosantu ezali Bonzambe kofanda na kati. Nandimaka ete bato minene mingi baoyo balobaka ete bazali na Molimo Mosantu bayebi Yango ata moke te. Ezali kokutana na Nzambe. Ndenge nini? Mokolo ya Pantekote!

²⁰³ Sikawa, bato balobaka, lokola ba-Batiste lelo, ba-Presbiterien ná ba-Metodiste.

Natunaki: “Bondimaka ete bozali na . . .”

²⁰⁴ “Oh, iyo, toyambaka Yango, na kondima.” Na kondima, eloko moko te! Ezali Yango te. Ezali koningana.

²⁰⁵ Bosepelaka komona ndenge moi eláláka. Botélémi pe bozali kotala moi kokende kolála, boléli, pe mai ya miso etangí. Oyo wana ezali Nzambe te. Ezali kotótómwa, longwa na eloko moko ezali kati na yo. Oyoki ete moto moko azali kobéla, to moto moko azali kobunda na liwa, okogánga pe okolela. Oyo wana ezali Nzambe te. Ezali kotótómwa ya bomoto. Ndenge nini Nzambe . . .

²⁰⁶ Nasilá komóná bato na lisano ya ndembo, kokóma na esengo koleka kino bibebu na bango ekobanda kolénga, pe nyonso wana. Bolóbela ngai yango te.

Tozali na bosenga ya kolamuka, lobiko. Bongo, ba-Pantekotiste bayáka wana, basukumaka bato, pe bayebisaka bango: “Ntango balobaki minoko ya sika, bazuaki Molimo Mosantu.” Pe bamosusu na bango babikaka lolenge nyonso ya bomoi, sima na yango.

Yoka, ndeko. Mokolo na Pantekote, ezalaki bongo te. Batalelaki minoko ya sika to eloko mosusu ata moke te. Ezalaki bango kuna, bazalaki esika moko, na motema moko, Nzambe akitaki, na bósóló, kati na bango. Bamonaki, likolo na moko moko na bango, ndemo ya Móto, lokola *boye*, ezalaki likolo ya mitó na bango. Nzambe azalaki wana. Ezalaki te: “Boyamba yango na kondima, to kotótómwa.” Batondisamaki na Molimo Mosantu, na sima babimaki pe babandaki koloba minoko na sika. Kasi, liboso, bakutanaki na Nzambe.

Yango nde likambo ya lelo. Bazali kosukuma pe koningisa bato, kotótómwa, kasi ezali Molimo Mosantu te. Molimo Mosantu Bonzambe kofanda na kati. Maloba na yo ekómi Maloba na Ye. Nalobi na bino, eloko tosengeli na yango lelo, ezali kobengama.

²⁰⁷ Bato bazali kokende kuna, basi ya ndenge wana, bazali kokende kuna, bazali koloba minoko ya sika, pe bazali kozonga. Pe soki okei esika na bango, na ba-losambo na bango . . .

²⁰⁸ Elingaki kozala malamumu soki Billy azalaki awa. Nauti kozua mokanda moko, euti esika moko kuna, mokolo mosusu, esika mwasi moko alobaki: “Nazali moto ya ebongiseli moko monene,” na ebongiseli ya monene koleka ya ba-Pantekotiste, ebongiseli monene ya ba-trinitaire. Balobaki: “Basi na biso nyonso, Ndeko Branham, bango nyonso bakátáka suki na bango. Ngai nazali na suki milai ya moindo.” Alobaki: “Nalingaka yango ntango nyonso, mpo nandimaka ete eutaki na Nkolo.” Alobaki: “Napokolaka bikelá-kela ata moke te. Lingomba na biso etéyaka ete ezali makambo ya kala.” Alobaki: “Balobaka na ngai, ntango nalingaki suki na ngai nwaní, na sima, balobaki: ‘Keba, ozali na piné esili mopepe na sima,’ pe makambo ya ndenge wana. Balobaki: ‘Omeme piné oyo esili—esili mopepe sima ya motó na yo.’” Pe alobaki: “Sukasuka mobali na ngai alobaki: ‘Mpo na nini okati suki na yo te mpo ózala lokola basi nyonso.’”

Sikawa nakomi mokanda mpo na kozongisela ye.

Alobaki: “Ezali bongo? Nayokaki moko na ba-bande na yo, ete libatizi ya Boklisto ezali na Nkombo ya Yesu Klisto.” Sikawa, boyebi eloko nini akozua. Boye te? [Losambo balobi: “Amen.”—N.D.E.] Alobaki: “Yebisa ngai, Ndeko Branham. Nazali na nzala. Nalingi koyeba likambo nini nasáláki.”

²⁰⁹ Nakoloba: “Nsóni na mobali na yo wana, oyo azóngá sima. Mpo na etónge ezángá-nzambe, esika osámbelaka, bimá kati na bango.” Ya solo. Nzambe akoki kobongwana te. Ntango Nzambe

alobi likambo, Alingi koloba yango. Ata ezali na batei boni bazóngá sima, baoyo balingi kosala mobémbano, mpo na kozua ebongiseli to etóngá ya monene. Tosengeli na bato bazali koteya lobiko. Mibali oyo bazali wana pe bazali kotika basi na bango kosala bongo, nazali na elikia moke na ebikeli na bino lokola Baklisto. Ya solo. Bóbongola motema, to bokokufa! Oh, mawa!

²¹⁰ Bakotaka kuna ndenge wana, bakótaka na mangomba, mangomba ya ba-Pantekotiste, babimaka pe babongwanaka ata moke te; batikalaka motindo moko, bakendeke liboso ata moke te. Oh, mawa. Ezali nini? Ba-Yezabele ya mikolo oyo. Na Biblia, ezali na mwasi bobele moko oyo apakolaki bikelá-kela na elongi na ye, pe Nzambe akabaki ye lokola bilei na ba-mbwa. Ba-Yezabele ya mikolo oyo, babéndaka ba-Akaba na bango na kingo ya elamba, mobali nyonso ya bibángá-banga, oyo akotika mwasi na ye kosala bongo, koláta kupé pe nyonso wana, kotika ye kobima awa na balabala pe koláta bilamba ekangi ye na loposo lokola saucisse oyo balongoli loposo ndenge wana. Pe akei. . . Nazali koloba yango mpo na kosekisa te. Oyo ezali esika ya máseki te. Oyo ezali Liloba na Nzambe. Ezali solo. Ya solo. Bazali kotambola na balabala, ná elamba ekangi ye nzoto mpenza, kino akoki kotambola te. Na sima, soki moto moko apámeli ye mpo na yango, olingi kobundisa ye. Osengeli kozua mbata na mbanga, ezali solo, ndenge otiki ye kosala bongo. Ezali kotalisa eloko nini ezali kati na yo. Ezali mpenza ya solo.

²¹¹ Eloko tosengeli na yango ezali Nsango-malamu. Nzambe, télemisa moto moko, oyo akozonga mpenza na Liloba. Nzambe alobaki ete ezali ata malamumoke te mpo na mwasi koyá ata na losambo pe kobondela ná suki bakátá. Pe mwasi oyo akati suki na ye, azali. . . mobali azali mpenza na ndingisa ya kokabwana na ye. Azali mwasi azangi-lokumu. Biblia elobi bongo. Azali mwasi azangi-lokumu mpo na mobali na ye. Ntango mosusu ayebi yango te. Mwasi nyonso oyo alataka kupe azali mwasi ya nsoni. Ntango mosusu ayebi yango te. Madame, nazali koluka kozokisa yo te. Nazali koluka kobikisa yo na libéké ya móto, pe na lífelo. Bóngola motema!

²¹² “Oh,” okoloba, “nazali na Molimo Mosantu.” Na sima, ozali kosala makambo wana, ná Nzambe kofánda kati na yo, Nzambe moko oyo alobaki ete ósala yango te?

²¹³ “Oh,” okoloba, “nalobaki minoko ya sika.” Nasila komóná milimo mabe koloba minoko ya sika. Nasila komóná bango, na Afrika, komela makila na mokuwa ya motó ya moto, koloba minoko ya sika pe kobéléla zábolo. Nasila kokendé na miláko ya bandoki pe bato na solóka, esika bazalaki koloba minoko ya sika pe kolimbola yango. Nasila komóná bikomeli likolo ya mésa kokoma na minoko eyebani te, pe moto yango ayei pe alimboli yango. Ezalaki solo. Okokosa ngai te mpo na minoko ya sika. Tokómi na yango mingi koleka sikawa.

Ata bongo, nandimaka ete Nzambe azali na monoko eyebani te. Nandimaka ete Nzambe alobaka na minoko eyebani te, kasi bótálelaka yango te. Polo alobaki: “Ata nalobi minoko ya bato pe ya Banje, soki nazangi Molimo Mosantu, nakómi naino eloko moko te. Ata nakoki kolongola ba-ngomba . . .”

214 Bato mingi balukaka koloba: “Oh, *oyo* azali moto monene ya Nzambe. Osengelaki komona bikamwa minene.” Ee, milimo mabe ebikisaka . . .

Milimo mabe ebimaka pe esalaka makambo ya bongo. Nayebi bandoki oyo babimaka, pe makambo ya ndenge wana, alati elamba moko ndenge *wana*. Bakotia mbongo na libenga na yango. Akozua suki na sima ya motó na ye, akoningisa yango kati na makila pe akopanza yango. Pe bato yango bazali bato sembo, bazali kondima. Ezali moto wana te. Ezali bato oyo bazali kondima ete babelemi liboso na Nzambe, na nzela ya ndoki yango.

215 Yesu alobaki te ete: “Na mokolo yango, bato mingi bakoya epai na Ngai pe bakoloba: ‘Nasalaki mayangani minene ya kobikisa babéli’?” Oyo wana ezali elembo te. Ezali elembo ete tokómi na suka. Yesu alobaki lisusu te, na Matai mokapo ya 24, pene na molongo ya 24, 24:24? Pe Alobaki: “Basakoli ya lokuta bakoya na ntango ya suka pe bakolakisa bilembo minene mpenza kino bakopengwisa Baponami mpenza soko nde bakokoka.” Kasi Baponami batelemi ngwi na Liloba. Bayebi eloko nini elembo ya solo ezali.

216 Ndenge nini moto, oyo asalaka makambo ya boye, oyo aboyaka Kondima ya Nzambe, akoki koloba ete azali mosakoli ya Nkolo? Ndenge nini mpenza moto akoki kosala yango?

Akoki kozala mosakoli, lokola baoyo bazalaki kuna na eleko ya Akaba ná Yosafata, ntango Mika atelemaki. Kasi bazalaki na moto moko kuna oyo atelemaki ngwi na Liloba, Eliya. Liloba na Nkolo ekomamaki, ete Akaba akokoma na suka na ye, pe emononeli ya Eliya ekokánáki na yango.

217 Pe moto nyonso, moto nyonso oyo akomibenga moto ya molimo to mosakoli, akoyeba ete Liloba nyonso ya *Oyo* ezali solo. Ndenge nini akoki kozala mo-trinitaire? Ndenge nini akoki kobatisa na Nkombo ya “Tata, Mwana pe Molimo Mosantu,” pe áloba ete apakólámi na Molimo? Ndenge nini akoki koteya bato libunga yango, pe ákoba kopakolama na Molimo? Ekoki kosalema te. Ezali eloko ekoki kosalema te.

218 Namoni ete esepelisaka bato te. Kasi toboyi kosepelisa bato. Bolingi kozala sembo.

Sikawa, Yezabele ná ba-Akaba. Iyo, misie.

219 Ee, mpo na nini basalaka bongo? Mpo na nini basi yango basalaka bongo, bakátáka ntango nyonso suki na bango, bapakolaka, babimaka, pe balátáka kupé wana mibali bazali

koleka pembeni, ná makambo ya ndenge wana, mibali na bango basalaka bongo? Mpo bazali na mosakoli ya solo te na eteyelo na bango, mpo na koyebisa bango Solo. Bayebisaka bango: “Ee, ekeseni na yango te. Ezali mabe te. Botindami na bino kosala yango te.” Bino!

²²⁰ Ezali Liloba na Nkolo. Biblia elobi: “Mwasi nyonso oyo akoláta elamba ya mobali azali mbindo liboso na Nzambe.” Nzambe abongwanaka te. Ndenge nini Akoki kobongwana pe ázala Nzambe? Azali na suka te.

²²¹ Basengeli na mosakoli ya solo oyo akoyebisa bango ete oyo wana ezali elembo ya suka. Biblia elobaki ete bakosala bongo. Yisaya, mokapo ya 5, elobi ete basi bakosala bongo na mikolo ya suka. Ya solo mpenza. Na bongo, bango wana.

²²² Kasi balobaka ete bazali na mosakoli na eteyelo, abangaka Liloba na Nzambe. Te . . . Abangaka nde eyanganelo.

Tóbondela mpo Nzambe átindela biso Pole ya suka, ba-Pole yango ya mpokwa, átindela biso moto oyo Alakaki kotinda, na Lingomba eponámá, moto oyo akoyebisa bango Solo, pe akotéléma ngwi na Liloba na Nzambe. Tika ba-Yezabele ná ba-Akaba, na ntango wana bakokabola bango. Ezali mpenza ya solo.

²²³ Bómikanisela ntango basi bakobanda kosala makambo ndenge wana. Sikawa bózonga mwa moke na sima, ntango babandáki kokáta suki na bango pe kosála bongo. Ntango basi bakobanda kosala bongo, ekozala na ntango wana pe na eleko wana nde Eliya ya ntango na suka asengeli komonana na mosala ná elembo ya ntango ya suka, ná elembo ya ntango na suka, lokola esalemaki na mikolo ya Lota. Bomoni? Elembo ya ntango na suka; ntango basi bakobanda kosala makambo ndenge wana. Bazali kosala makambo ndenge wana sikawa. Ezali na ntango yango nde Elisa asengeli komonana na mosala, koluka-luka mpenza pe kobenga, kopamela pe kobuka, ya solo, ná elembo ya Nzambe sima na ye, kokóba kokende liboso. Akobénga boike na bato te, sikawa. Biblia elobi: “Kobanga te, etónge moke, esepelisi Tata na bino ete ápesa bino Bokonzi.” Ezali solo. Ezali mpenza solo.

²²⁴ Asengeli koboyama na bato nyonso, longola bobele etónge moke, mpo azali lokola Eliya ná bato na ye nkama nsambo, pe Yoane ná etónge moke na ye. Iyo.

²²⁵ Bomoni esika tokómi lelo? Tosengeli kozonga na Pantekote ya ebandeli. Tosengeli kozonga na makambo ya Nzambe. Tosengeli kozonga. Ndeko mobali, ndeko mwasi, kopéngwisama te na ebikeli na yo. Tozali—tozali kozela ngonga yango.

²²⁶ Koloba bobele te: “Na—nazali kolikia bongo. Nakanisi, na nzela na kondima, nasili koyamba Yango.” Kosala bongo te. Kútana na Nzambe, miso na miso, pe okotondisama na Molimo, na sima, okomona likambo ekosalema. Kasi soki molimo oyo

ezali kati na yo ekeseni na Liloba oyo, na boye tika molimo yango. Kende kozua . . . Na ntango wana, bondela mpo Nzambe ápesa yo Molimo.

²²⁷ Ntango Molimo yango ekotelema na mokolo ya suka, ekozala likebisi kotelemela bango, baoyo bazali na libunga. Bomoni? Mpamba te, Yoane alobaki: “Bókanisa te komilobela ete biso, ete ‘Abalahama nde tata na biso.’” Tozali na . . . Tozali . . .

“Biso, ba-tata na biso bazalaki ba-Methodiste, ba-Batiste, ba-Presbiterien, to ba-Pantekotiste.” Bino, bókanisa te koloba: “Nzambe,” ete bozali bana ya Abalahama, mpamba te Nzambe akoki, longwa na mabanga oyo, kobimisela Abalahama bana. Bókanisa te ete lokola bozali ba-Pantekotiste, bokolimbisama mpo na yango. Ata moke te. Nzambe akoki, longwa na mabanga oyo, kobimisela Abalahama bana. Ezali mpenza solo. Iyo, misie.

²²⁸ Koloba bobele Liloba na Nzambe, na bosóló ya mokolo ya suka, yango nde lisakoli na ye.

²²⁹ Soki, bino botika názunga sima awa mwa moke, botika nálakisa bino lolenge nini tokoki koyeba. Nazali na Makomi mingi oyo nakomaki awa. Nazalaki kotalela yango. Nalingi kotángela bino moko. Kobanda na, tózua liboso, tózua . . . Tózua Dutelonome, mokapo ya 18, tokoyeba yango, bózela naino. Mpo, liboso tósilisa awa, mpo nákoka kotángela bino Likomi oyo. Na Dutelonome, mokapo ya 18, malamu, pe tótala sikawa. Molongo ya 20 ya mokapo ya 18, Dutelonome, 20.

Kasi mosakoli oyo, na lofúndo mpenza, akoloba na nkombo na ngai, liloba oyo ngai natindi ye te ete áloba, to oyo akoloba na nkombo ya ba-nzambe mosusu (na boike), mosakoli yango akokufa.

Ezali solo. Asili kokufa na molimo. Malamu. “Molimo oyo ekosala lisumu, ekokufa.” Tozali na Nzambe moko, “ba-Nzambe” te.

Pe soki olobi na motema na yo, Ndenge nini tokoyeba liloba oyo YAWE a . . . alobi te?

“Tokoyeba ndenge nini? Ekozala na mingi na bango mpenza, tokoyeba ndenge nini? Oyo alobi boye, oyo mosusu alobi boye; lokola, moko alobi boye, pe oyo mosusu alobaki oyo wana, pe bongo na bongo.” Sikawa botala. Toyebi.

Ntango mosakoli alobi na nkombo na YAWE, soki liloba yango esalemi te, to ekokisami te, yango ezali liloba oyo YAWE alobaki te, kasi mosakoli yango alobaki yango na lofúndo: osengeli kobanga ye te.

²³⁰ Soki Nzambe moto alobaki yango te, na bongo, kobanga yango te. Yango, ezali malamu, kende liboso pe bósana yango. Bomoni?

²³¹ Sikawa bótala makambo tokómi koyoka lelo. Endimeli ya Bantóma, endimeli ya ba-Methodiste, endimeli ya ba-Batiste,

endimeli ya ba-Pantekotiste, endimeli, endimeli, endimeli. Endimeli ezali nini? Bozuaka yango wapi? Nabeti ntembe na moto nyonso mpo na kolakisa ngai Endimeli ya Bantóma kati na Biblia. Nandimaka ete likambo ya bongo ezalaka te.

Soki basakoli bazalaki na endimeli oyo bakangamaki mpenza na yango, yango oyo: “Bóbongola mitema, moko na moko na bino, pe bóbatisama na Nkombo na Yesu Klisto mpo na bolimbisi ya masumu na bino, pe bokozua likabo ya Molimo Mosantu. Mpo eláká ezali mpo na bino.”

Bozali komona te esika tokómi, baninga? Tokómi na lolenge ya mabe mpenza. Ezali nini? Elembo ya solo oyo etiolami.

²³² Sikawa, bozali basi ná mibali, mingi kati na bino, pe bozali bana na Nzambe. Bótiola yango te. Bóbosana te ete tosendeli kozala na makambo oyo. Esengeli kosalema na eleko oyo, na ngonga oyo tozali kobika na yango. Oyo nde ngonga yango, liboso ya Boyei ya Masiya, liyebisi moko esengeli kolobama, longwa na Nzambe.

Bótika nátángela bino yango. Tózonga na Malaki. Ezali suka ya Kondimana ya Kala, pe bóyoka ndenge Alobi awa na Malaki. Na sima, toko . . . Bóyoka naino oyo.

Sikawa, soki botali malamumu, Malaki 3, elobeli likambo Yesu alobaki na boyei ya Yoane.

Tala, nakotinda motindami na ngai, pe akobongisa nzela liboso na ngai: pe Nkolo, oyo bozali kozela, akoya pwasa na tempelo na ye, pe motindami ya kondimana, oyo bino bozali kosepela na ye: tala, akoya mpenza, YAWE na bibebe alobi bongo.

²³³ Oyo wana ezalaki Yoane, kosakola boyei ya Yesu. Pe Ayaki na tempelo, ndenge mpenza Alobaki, Motindami ya kondimana, Mwanje oyo azalaki elongo na . . . kati na bilikí elongo na—elongo na bayekoli, to elongo na Yisalaele. Bondimi ete Ye azalaki Motindami yango? [Losambo balobi: “Amen.”—N.D.E.] “Ee,” Alobaki, “Nauti na Nzambe, pe Nazongi na Nzambe.”

²³⁴ Sikawa, mpo na nini Polo apesamelaki bokono? Mpo ámitombola te.

Sima na Yesu kokufa, kokundama, pe kosekwa; sima na ntango molai, Polo akutanaki na Ye, miso na miso, na nzela ya Damaseke. (Alobaki: “Nauti na Nzambe, pe Nakozonga na Nzambe.”) Polo atombolaki miso. Pole moko makasi ezalaki wana, Likonzi na Mótó yango moko. Boyebi likambo nazali kolobela? [Losambo balobi: “Amen.”—N.D.E.] Likonzi na Mótó yango moko. Pe Polo asololaki na Ye, pe Asololaki na Polo. Bato mosusu bayokaki Ye te. Bayokaki Ye te. Kasi Polo ayokaki Ye. Alobaki: “Saulo, Saulo, mpo na nini ozali konyokola Ngai?”

Alobaki: “Yo ozali nani, Nkolo?”

235 Alobaki: “Ngai Yesu. Sikawa téléma, kende na balabala ebengami Alima. Kuna nde bakoyebisa yo makambo. Nazali na mosakoli moko kuna oyo akoyebisa yo makambo osengeli kosala, omoni. Pe ndenge nini . . .”

236 Bamemaki Polo kuna, azuaki libatishi, abelelaki Nkolo pe ayambaki Molimo Mosantu.

Polo alobaki: “Nazalaki na bokono na nzoto, oyo epesamelaki ngai, molimo mabe, motindami ya zabolo, oyo azalaki *kobeta* ngai,” ezali lokola, “ebotú sima ebotú.” Soki akómi malamumu, na sima, azui yango lisusu, abeti ye lisusu. Alobaki: “Naluki elongi na na Nkolo mbala misato, mpo na kolongola ngai yango, kasi Nkolo alobaki: ‘Polo, ngolu na Ngai ekoki.’” Na sima alobaki: “Kaka mpo námitombola koleka ndelo te, na ntina na ebele koleka ya emoniseli.”

Ayebaki makambo mingi, na nzela na emoniseli, koleka Petelo, Yakobo, Yoane, to bango nyonso. Amonaki Ye, sima na Ye kokende, eleki pene na mibu mibale, to koleka, azalaki kati na Likonzi na Móto, kosolola na ye. Koleka boni lelo, mibu nkóto mibale, pe Azali bobele na bomoi! Amen.

237 Alobaki: “Napesamelaki yango, kaka mpo námitombola koleka te, koloba: ‘Tala, ndeko, naleki bino nyonso. Omoni? Ngai na—namonaki Ye sima na lisekwa na Ye longwa na bakufi, pe nasololaki na Ye. Ngai . . .’ Kaka mpo námitombola koleka te wana, napesamelaki eloko moko, mpo ébatela ngai na komikitisa.” Iyo.

238 Ye moto ayebisaki bango ete bázua lisusu libatishi na Nkombo na Yesu. Alobaki: “Ata Mwanje ya Likolo . . .”

239 Alobaki: “Ngai natángaki na biteyelo na bango te, ata bazalaki wapi.” Alobaki: “Nakendeki mbala moko na Yelusaleme te, na mibu zomi na minei.” Alobaki: “Nakendeki na Ezipito, kuna na Azia.” Pe azalaki koluka elongi na Nkolo, asalaki pene na mibu misato kuna, koyekola Kondimana ya Kala, kokokanisa yango nyonso. Ntango azongaki, sima na mibu zomi na minei, akutanaki na Petelo ná bamosusu, pe bazalaki na Nsango-malamumu yango moko, bazalaki kobatisha motindo moko, pe kosala makambo ndenge moko. Amen. Ayebaki ete ezalaki solo. Iyo, misie.

240 Bóyoka sikawa Malaki, awa, Malaki 3. Sikawa, soki bokoki, tika náyebisa bino yango polele, nakanisi. Sikawa, na malembe, tózua Matai mokapo ya 11. Pe tótala soki . . . Ntango mosusu ezali yango te. Nakanisi ete nasili kozua yango. Ntango mosusu nasengeli liboso kotala mpo námona yango. Matai 11. Tótala. Tóbanda na:

Nzokande ntango Yesu asilisaki kopesa bayekoli na ye zomi na mibale malako, alongwaki kuna pe akendeki kolakisa pe koteya na bingumba na bango.

Pe . . . *Kasi ntango Yoane . . . ayokaki* ete azalaki . . . na boloko nsango ya misala ya *Klisto*, azalaki . . . boloko nsango ya misala ya *Klisto*, atindaki maloba na bayekoli na ye mibale,

Pe alobaki na ye ete, Yo ozali ye oyo akoya, to tosengeli nde kozela mosusu?

Miso ya mpongo ya Yoane ebotaki mposo, kuna na boloko. Bomoni?

Yesu azongiselaki ye ete, Bókende . . . koyebisa Yoane makambo oyo yo, bino bozali koyoka pe komona:

“Yoane azali mosakoli. Pe soki a—ayoki likambo oyo, makambo oyo ezali kosalema, akoyeba Nani Ngai nazali.” Bomoni? Alobaki:

Bakufi miso bazali komona lisusu, . . . batengumi bazali kotambola, bato na mbala bazali kopetolama, . . . bakufi matoi bazali koyoka, pe bakufi bazali kosekwa, . . .

“Pe bibongiseli nyonso esangani”? Elobami bongo te, boye te? [Losambo balobi: “Te.”—N.D.E.] Te. Elobi bongo te. Elobi:

. . . batengumi bazali kotambola, bato na mbala bazali kopetolama, . . . bakufi matoi bazali koyoka, pe bakufi bazali kosekwa, pe babola bazali koyoka nsango-malamu.

Yango nde elembo. Bótala. “Pe ntango bakendekei . . .”

Pe lipamboli epai na ye oyo azali . . . abeti libaku epai na ngai te.

Sikawa bótala. “Lipamboli na ye oyo abeti *libaku* epai na Ngai te,” na elobeli mosusu, to: “ayoki ‘nsóni’ mpo na Ngai. Lipamboli na ye oyo akoyoka nsóni mpo na Ngai te.” Bomoni?

. . . ntango bakendekei, Yesu abandaki koloba na ebele ya bato mpo na Yoane, Bokendekei kotala nini na bilíki?

Bótala sikawa mosakoli yango.

. . . Bokendekei kotala nini na bilíki? Mokekele oyo eningani na mopepe?

Yoane te. Oh, te. “Bino libota ya banyoka na matiti,” alobaki na bibongiseli wana, “nani akebisi bino kokima nkanda ezali koya? Bóbanda koloba te: “Tozali bato ya oyo pe oyo kuna, mpo Nzambe azali na makoki ya kobimisa bana longwa na mabanga oyo.” Oh, ndeko mobali, ezalaki mokekele eningisami na mopepe te, mpo na ye.

. . . Mokekele oyo eningani na mopepe?

To bokendekei kotala nini? Moto oyo alati bilamba ya *petepete*? (Oyo asengeli kolátá-lata bilamba mbala mibale to misato wana azali koteya?) tala, baoyo

balataka molato, bilamba ya petepete bazalaka na ndako ya bakonzi.

Ezali batei oyo bakendeke kopwepwa ba-bebé, boyebi, pe—pe kobalisa bilenge, pe—pe kokendeke na biteyelo mpo na kosolola makambo ya mayele mingi, pe, boyebi, makambo mike-mike nyonso wana ezánga ntina. Bomoni? Bomoni? Asalaka maseki awa na libanda ya bitumba te. “Bokendeke kotala nini, moto moko ya ndenge wana?” Ee, Atuni bango.

Kasi bino bokendeke . . . kotala nini? Mosakoli? (Boyoka.) ya solo, pe nazali koloba na bino, azali koleka mosakoli.

Iyo, misie. Azalaki nini? “Alobi ete azali ‘koleka mosakoli?’” Azalaki mosakoli, koleka. Azalaki motindami ya eleko wana.

. . . bokendeke kotala nini kuna? Mosakoli? ya solo, pe nazali koloba na bino, azali koleka mosakoli.

Mpo azali ye, . . . oyo ekomámá mpo na ye ete, Tala, nakotinda motindami na ngai liboso na elongi na ngai, . . . mpo na kobongisa nzela liboso na ngai.

Bótala awa na Malaki 3. “Tala, Nakotinda motindami na Ngai liboso na elongi na Ngai.”

²⁴¹ Bótala. Sikawa, Malaki 4, botika nátánga yango. Akoya lisusu.

. . . tala, mokolo ezali koya, ezali kopela lokola litumbu ya móto; pe bato nyonso ya lolendo, ya solo, . . .

²⁴² Ezali lelo. Natámbolaka na balabála pe namonaka bato yango. Soki osololi na bango, bakoseka yo pe bakotiola yo. Nakanisaka, ezali nini? Mokolo mosusu, nazalaki kotambola kuna, pembeni na elanga oyo ezali awa. Nazalaki kosolola na bato moko, pe balobaki: “Oh,” balekaki na bango.

Eloko moko elobaki na ngai: “Bakokufa na bombe atomique, etikali moke, bakozala putulú oyo ekopanzana na nse. Tika bango. Osili kolobela kimia na yo. Milengela mpo na kolongwa awa.” Aleluya! Esengelaki te ete náloba yango, nabanzi. “Milengelé. Kanga lokéto na yo. Nakobénga yo.” Yango wana nazali kozela.

Mpo, tala, mokolo ezali koya, ezali kopela lokola litumbu ya móto; ya solo, bato nyonso ya lolendo, . . . pe baoyo nyonso basalaka mabe, bakokóma lokola mpumbulu: . . .

Yango mpenza nde ekozala. Likambo nini ekosalema ntango . . . bato mosusu kati na bino basali bilanga; ntango móto makasi ekoti na elanga ya masangu, ekotikala bobele matíti ya mpamba? Elalisaka yango mpenza na nse, ná putulú na sima. Yango nde likambo ekosalema, na ntango yango, ntango ekobeta.

. . . *mokolo oyo ekoya ekozikisa bango mobimba, YAWE na bibeale alobi bongo, ekotikela bango mosisa to etape te.*

Eloko na bango ata moko te ekotikala.

Kasi mpo na bino baoyo bobangaka nkombo na ngai, Moi ya boyengebene ekobima, ná kobikisa kati na mapapu na yango; . . . bokobima, pe bokopumbwaw-pumbwa lokola bana ya ngombe na kati ya lopango. (Ezali Bokonzi ya mbula nkóto.)

Pe bokonyata bato mabe; mpo bakokóma lokola putulú na nse ya makolo na bino na mokolo oyo nakosala makambo oyo, YAWE na bibeale alobi bongo.

Kokota na Bokonzi ya mbula nkóto. “Putulú ya bato mabe.”

Bókanisa . . . mobeko ya Mose mosali na ngai, oyo napesaki . . . ye na Horebe mpo na Yisalaele mobimba, malako pe kosambisa.

Sikawa, bóyoka malamú sikawa.

Tala, nakotindela bino Eliya mosakoli liboso na boyei ya mokolo yango monene pe ya nsomo ya NKOLO:

²⁴³ Sikawa, ekokaki kozala Yoane te. Ekokaki te, mpo mokili elingaki kobebisama na ntango wana. Kasi awa Alobaki, na Matai 3, Atindi motindami liboso na Ye. Pe Yesu alobaki: “Ye nde Eliya oyo asengelaki koya, mpo na kobongisa nzela liboso na Ngai.”

“Kasi liboso bombe atomique monene wana ébeta, Nakotindela bino Eliya mosakoli.”

Pe akozongisa mitema ya ba-tata epai na bana, pe mitema ya bana epai na ba-tata, ete náya pe nábeta mokili na ekweli mabe te.

²⁴⁴ Kosakola, na eleko oyo.

Kasi sikawa bokoloba: “Oh, Eliya yango, esengelaki kozala Yoane.” Motindami ya kondimana ezalaki Yoane, ya solo. Ezali mpenza solo. Yesu alobaki bongo pe atatolaki yango awa: “Ye nde moto Nalobelaki.” Kasi, bomoni, ekokaki kozala Eliya oyo asengelaki koya te. Bomoni? Ekokaki kozala ye te. Mpo, bomoni, soki ezalaki bongo, na boye lisakoli yango ezalaki lokuta; mokili ebebisamaki te na ntango wana. Bomoni? “Kasi liboso mokolo yango monene pe ya nsomo ya Nkolo éya, Nakotindela bino Eliya. Pe akozongisa,” bótala malamú boyei na Ye ya liboso, “mitema ya ba-tata epai na bana.” Yangó nde Asalaki liboso, amemaki nsango ya ekeke ya sika, boyei ya Klisto sikawa, kolongola batata ya mimesano ya kala na kondima ya mimesano yango, kokotisa bango na kondima ya sika, oyo eutaki kobotama.

Na sima, ntango Akoya mbala ya mibale: “Pe mitema ya bana epai na ba-tata ya pantekote, Nsango ya ebandeli.”

²⁴⁵ Sikawa tókende awa na Emoniseli 3, pe bokomona yango lisusu kuna. Na bongo, esakolámáki. Tozali na ntango ya suka, ndeko na ngai. Ezali solo.

²⁴⁶ Lokola basakoli nkama minei oyo batelemelaki Mika, bazali koloba ete tozali. . . Tozali na ntango yango ya suka, toyebi. Basakoli ya lokuta bazali kotalisa bilembo ya lokuta, kokota na bibongiseli. Balobaka: “Bóya kokota. Tósangana. Bóya kokota na lingomba na biso. Bóya na kalati ya mondimi. Tofungoli ekuke na ntongo ya lelo mpo na kobóngola kalati na yo ya mondimi kolongwa *wana* pe kokóta na lingomba *oyo*.” Oh, boléma. Kalati na yo ya mondimi ekosunga yo na nini? Soki ozali na libúla ya Lóla te, bósana yango. Basakoli ya lokuta bakosala bilembo ya lokuta.

²⁴⁷ Kasi, bótala, basakoli ya solo, bakokangama na Liloba na Nzambe. Bilembo ya solo ekobóta mbuma ya Liloba na Nzambe ya solo mpo na Lingomba ya solo, pe Lingomba ya solo ekoyamba Liloba pe ekosepela na Yango. Ntango etóngá moke, oyo ekopesama na mikolo ya suka, ekozala bato moke mpenza ya Mabota, baoyo bakomemama.

²⁴⁸ Ntango Yesu ayaki, bobele—bobele bato moke mpenza nde bandimaki kuna. Etóngá moke ya Yoane ezalaki baoyo bandimaki. Yesu azuaki bango kobanda wana, akómisaki bango bayekoli pe bakobaki. Ntango Eliya . . .

²⁴⁹ Ntango kobebisama eyaki, ntango eleko ya Nowa eyaki, azalaki elembo, pe akotisaki bato na masuwa. Ntango Eliya ayaki, abimisaki bato kati na mobulu bazalaki na yango. Ntango Yoane ayaki. . . Basakoli nyonso bazalaki elembo, elembo, bilembo, elembo.

Pe Alakaki biso elembo moko na ntango ya suka. Na ntango ya suka, elembo moko ekozala. Ezali elembo oyo etiolami. Bato bazali komona yango te. Bazali bobele koleka likolo na yango, pe kolekisa yango. Ndeko mobali, ndeko mwasi, kokóta na lingomba te. Bótika náloba likambo oyo, mpo na kosukisa sikawa.

²⁵⁰ Soki osilá kobikela bobele likambo ya kotótómwa, ya koningana, kotia elikia likolo na yango te. Kosala yango te, mpo na bato na yo. Ozali. . . Nazali koloba na bato. Nayoki bango kofina ba-bouton ya ba-magnetophone kuna, mbala moko. Nazali sikawa koloba na Lingomba. Bomoni? Bóyoka. Bómeka te.

²⁵¹ Nalobaka makambo yango mingi mbala na mbala, ndenge wana, mpo ete bato oyo bazali libanda na mboka oyo, bákangama na Nzambe. Bótala malamú mpo na elembo na bino ya solo. Bokomona yango. Ekozala zonga-zonga na bino, kasi ba-

milió na bato bakoleka mpenza pembeni na yango pe bakomona yango te.

Ntango Yesu ayaki, bayebaki Ye te.

Bayebaki Eliya te. Boyebi likambo nini balobaki ntango Eliya amataki na likolo? Bandimaki boléma wana te. Balobaki: “Ezali boléma.” Bana mike oyo kuna, na engumba mpenza oyo azalaki kofanda. Azalaki kofanda kuna, koteya kuna, kosala bilembo pe bikamwa kuna, na mboka yango mpenza. Ntango nsango moko eyaki: “Tozali lisusu komona Eliya te; Nkolo amemi ye na likolo, kati na ekumbaki,” basekaki likambo yango mpenza.

²⁵² Tala Eliya, Elisa ayaki, ná bilembo yango moko likolo na ye, elilingi ya Klisto ná Lingomba na Ye. Tala Eliya ayaki, ndenge moko; Elisa, bilembo ya motindo moko na oyo Eliya azalaki na yango, akitaki, asalaki yango. Ata bana na bango ya mike balandaki ye, bazalaki koloba: “Mobange moto na libandi, mpo na nini omataki likolo lokola Eliya te?” Bomoni likambo ekómelaki bana yango, oyo bazángá limemia?

Lelo, bazali koseka pe kotiola. Komitungisa te, ndeko, kosambisama eteleme na likolo sika-sikawa. Ekomami na elongi ya mo-Amerika nyonso. Ezali solo. Kosambisama eteleme na likolo, nkanda nyonso ya Nzambe na Nguya-nyonso.

²⁵³ [Maloba mazangi na bande—N.D.E.] “Bayini ya bato malamumu; bazali lokola basambeli, kasi bazali kowangana nguya na yango: kima bato ya lolenge wana.”

²⁵⁴ Kozua koningana te. Kozua kotótómwa te. Kozua eloko moko te kino ete okokutana na Nzambe, miso na miso, pe tika Molimo na Nzambe ékota kati na yo. Akotondisa motema pe molimo na yo na nguya, na bolingo, pe na móto.

²⁵⁵ Nzambe, sunga ngai ete námona esika na ngai na ngámbo, esika moko na mikolo mike mizali koya, nátikala kuna kino nakomona esika nasengeli kokende na sima.

²⁵⁶ Tosili kozela ntango molai. Nasili kozela ntango molai. Nakanisi ntango nazalaki kokata matiti kuna na lopango na ngai. Ntango natongaki ndako oyo awa, Nkolo abengaki ngai. Mwasi na ngai alelaki mpo alingaki kotika mama na ye te. Alobaki: “Ntango mosusu bakobatela ye malamumu te.”

Nalobaki: “Ngai pe nazali na mama oyo akóli.”

²⁵⁷ Nafandaki kuna, mokolo moko, ntango nazalaki kokata matiti. Nafandaki. Na polele mpenza, Mongongo moko eyaki, elobaki: “Kabwana na bango, na sima Nakopambola yo.”

Nalobaki: “Nkolo Nzambe, pesa ngai esengo awa. Omoni likambo oyo nazali kotelemela awa.”

²⁵⁸ Makambo nyonso wana esili sikawa. Mama Broy azali na Nkembo; Mama Branham pe lokola.

“Nákende wapi, Nkolo?”

259 Kosambisama elingi kobeta ekólo oyo, moko na mikolo oyo. Bikólo mosusu ezali, oyo eyoki naino Nsango-malamu te. Bisika ezali.

260 Ata bokosala nini, bóbosana maloba na ngai te. Bóbosana te. Bótika ete ékota malamumu. Tika ete Nzambe ázua ekomeli ya ebende pe ákoma yango na mitema na bino, mpo bóbosana yango te. Bóbosana yango te. YANGO ELOBI NKOLO. Bózongela Nzambe na motema mobimba. Bózonga. Bótalela kotótómwa te, koningana to eloko moko te. Bóluka Nzambe na nyonso ezali kati na bino, kino eloko moko ésálamela bino, ete bokolinga komisémola, bokolinga kozala búlee, bokobánga Nzambe, bo—bokolinga kobika sembo. Bósala yango. Bóbosana yango te, mpo tokómi na ntango ya suka. Sikawa, bóbosana te, tozali na ntango ya suka.

261 Pe bóbosana likambo oyo te, wana nazali kosukisa, mpo na kobondela, na miníti moke. Bóbosana te. Bóyoka ngai, mongombo. Soki bazali naino kozua maloba oyo na bande, bóyoka ngai, mokili mobimba, esika yango ekokende. Elembo moko ekoya, elembo ya solo. Ntango mosusu esili koya kasi etiolami, elembo ya solo oyo Nzambe apesaka ntango nyonso, oyo etiolamaka.

Tóbondela.

262 Yesu ya Nazarete, ndenge Mongongo ya nkembo wana elobaki kuna mokolo wana, eleki mwa ba-mpóso, nazalaki pembeni wana, ntango nazalaki kokatisa mobímbi ya nzete wana, pembeni na nzete, pe Molimo ekitaki, elekaki na nzela na basónge ya ba-nzete yango, pe elobaki: “Yesu ya Kondimana ya Sika azali Yaweh ya oyo ya Kala.” E Nzambe, natélémi likolo na Libanga yango. Mabelé mosusu nyonso ezali zelo ya kozindisa. Mabelé mosusu nyonso ezali zelo ya kozindisa.

263 Mpamba te, esili koleka pene na mibu ntuku misato, Nkolo, nabélélaki awa, kati na lobwakú oyo. Nsango yango, natángwe na Yango ata moke te, kobanda esika nabandáki, ezali Nsango yango moko, motindo moko; kobénga bato ete bázonga, na koningana te, kasi na ebikeli ya kokutana na Nzambe pe kobotama na Molimo na Ye. Oh, eloko nini ekotikala, soki kosambisama te? Baoyo bazali koboya Nsango yango, Nkolo, eloko moko etikali te.

264 Osili kokokisa mpenza Liloba na Yo, mpo na kotalisa bilembo ya ntango ya suka, pe kondimisa yango, kozanga kokweya, ete Ozali Nzambe, pe yango ntina tozali awa. Ata ntango tozali koyoka ba-evangeliste minene na bikólo lelo, bango nyonso bazali kogánga. Na engumba-mokonzi ya ekólo na biso, pe bikólo mosusu elandi, pe—pe nsómo ezali kokita. Pe ntango tozali koyoka bato minene oyo, kuna na France, koloba ete bombe ya liboso ekokweya na Louisville, na Kentucky,

ekopanzana na ekólo mobimba na ba-kilometre nkama na nkama. E Nzambe, bazuaki libaku malamumu ya koyoka, kasi baboyaki.

²⁶⁵ Ba-zulunále, mikanda ya mangomba, television, radio, elobeli yango. Komilongisa ekozala te. Na bongo, Nkolo, Olobaki: “Baoyo nyonso Tata apesi Ngai bakoya, pe moto moko te akoki koya soki Tata abendi ye liboso te.”

²⁶⁶ Sikawa, Tata, nazali kobondela libondeli oyo mpo na ngai moko. Ngai oyo, nabandi sikawa kokóma mobangé, pe nayebi te soki totikali na mikolo boni, Nkolo. Ntango mosusu totikali bobele na mokolo ya lelo. Kasi ata eloko nini etikali, Nkolo, pe oyo etikali na bomoi na ngai, E Nzambe, ekoki kosalema ete Ókoka kozua yango mpo na kosala na yango likambo moko, mpo na nkembo na Yo?

²⁶⁷ Nazali kobondela liboso mpo na ngai moko, Nkolo, ete Ópesa ngai mokano na Yo. Tika ete mokano na Yo ésalema, Nkolo, ata ekoki kozala nini. Nalingi ete, mokolo wana, ntango nakoya kokutana na Yo, élobama: “Mosala esalemaki malamumu.” Ézala monene, to ézala moke, eloko nyonso oyo ezali na motema na Yo monene mpo na bomoi na ngai, Nkolo, ngai oyo.

²⁶⁸ Tinda Mwanje ná likala ya móto pe petola bibebu na biso pe bulisa biso, Nkolo, mpo na likambo monene ya suka, oyo elingi kobeta mokili. Tika ete tózala mongongo ezali kogánga na bilíkí ya masumu: “Bómilengele mpo na kokutana na Nzambe.”

²⁶⁹ Lingomba moke oyo, bato oyo bayáka, mokolo na mokolo, kosala ba-kilometre nkama na nkama na motuka. E Yawe na bolingo, oyo abosanaka ata mosala moko te; Nzambe ya Abalahama, Yisaka pe ya Yakobo; oyo Asekwisaki Yesu longwa na bakufi, pe sikawa Afandi na loboko ya mobali ya Bokonzi monene kuna na Likolo; Nzambe afandi kati na nzoto: pámbola bato oyo, baoyo napamboli na Nkombo na Yo. Tika ete bámikaniselaka ntango nyonso pe báyebaka ete elembo moko ezali, elembo ya suka. Nasengi ete Ópesa bango, pe Ókómisa bango balóngi ya bamosusu: na mosala na bango, bisika nyonso bakoki kozala, na matákanelo ya babalabala, na bisika batékaka carburant, to esika nini, mpo na kotatola na ba-magasin, epai ya moteki miliki. Ata esika nini, Nkolo, soki eloko moko elobeli bango na motema, tika ete bázala batátoli. Tika ete bábika bomoi ya bonzambe pe ya bulee kino bakokóma mikanda mikomami pe mitángami na bato nyonso.

²⁷⁰ Nzambe, pambola basi kati na biso. E Nzambe, nabondeli ete Ósala ete básukola bilongi na bango, baoyo basali yango naino te, bálóngola. . . bipakola-pakola wana ya Yezabele mosika na bango. Tika ete bázala na mpiko ekoki ya baKlisto, ná Molimo na Nzambe likolo na bango, mpo báyeba ete basengeli kolata bilamba wana ya mbindo oyo balataka te. Tika ete suki na bango ékola, lokola ya basi-ya-lokumu. Mpo ekomami na Biblia:

“Ezali na motuya monene na miso na Yawe etónge moke oyo ekokima makambo nyonso oyo ekosalema na ntango ya suka. Ekozala nkembo monene na miso ya Nzambe,” ndenge mosakoli asakolaki yango. E Nzambe, kokisa yango.

271 Nakoki lisusu kosala eloko moko te. Nagángi na mongongo makasi, mobu na mobu, Nkolo. Bobele soki Yo oyei kosala sikawa, ngai nakoki kosala eloko moko te. Nabondeli ete Ósala sikawa. Pe nayebi ete Okosala, mpo Olakaki yango na Liloba na Yo. Pe yango nde esika natelemi. Nakoki bobele kopesa litatoli, Nkolo. Pe moto moko akoki koya soki Yo obendi ye te; pe baoyo nyonso Tata apésáki, bakoya. Nazali na elikia yango, ete Liloba na Yo ekobatelama. Pambola biso, Nkolo.

272 Pe soki bato mosusu bazali awa, baoyo bazali kotalela bobele koningana, ntango mosusu bagángaki. Ntango mosusu bazali na Molimo Mosantu. To, tokotalela yango te, Nkolo, mpo tosili komóná bato na lisano ya ndembo kogánga. Tosili komóná bato na bisengo ya mokili kogánga. Tosili komóná bato kozala na esengo mingi kino bakómi kolela, na nse, kobina, pe makambo nyonso wana. Oyo wana ezali Yo te, Nzambe.

273 Kasi kokutana na Yo pe kosolola na Yo, pe Yo koyanola, yango nde eloko tolingi, Nkolo. Oh, nabondeli Yo, Nzambe, na miniti oyo mpenza, ete Ótinda Molimo Mosantu na ndako oyo, na esika moke oyo ya komikitisa. Esika moko te ebongi mpo na Ye koyá. Kasi nabondeli, Nzambe, ete, na lolenge na Yo moko, Ótinda Ye na esika oyo sikawa. Ndimisa milimo.

274 Ndenge nauti koloba, Nkolo, ntango mosusu Osili kotia libanga ya libaku liboso ya moto moko, na ntina na kobenga bato na etumbelo, kobondela pe kondimisa bato mpo na koyá. Pe ntango tokozonga na mobu ekoya, tokokuta bango bana ya lifelo mbala mibale, koleka ndenge bazalaki liboso. Ndenge nini bakoki koya soki Yo, Molimo Mosantu ya nkembo, ondimisi pe okweisi bango te?

275 Pe nabondeli Yo, Nkolo Nzambe, soki mosumuki yango, mobali to mwasi, mwana mobali to mwana mwasi, soki azali esika oyo na ntongo oyo, tika ete Molimo Mosantu ákoka koya na nguya ya kondimisa kino mpisoli ekokita na matáma na bango pe ekotanga kino na bomoto na bango ya kati, Nkolo, ete longwa na bozindo ya mitema na bango, bándima pe báyamba Klisto. Kokisa yango, Nkolo. Basengeli na etumbelo te. Bomoto na bango ya kati ekozala etumbelo na bango. Kokisa yango, Nkolo. Na bongo, bakoyá epai na Yo na motema mobimba, pe bakoloba: “Nalingi sikawa kozua libatizi na Nkombo na Yesu Klisto mpo na bolimbisi ya masumu na ngai, oyo nauti koyambola.” Kokisa yango, Nkolo. Tondisa bango na Molimo Mosantu.

276 Pesa biso ba-evangeliste na mokili lelo, ezali te baoyo bandimisaka pe babendaka, mpo na kosala bana ya bibongiseli. E Nzambe, télémisa Yo moko bana na Yo. Sálá ete bato

bábondela, Nkolo. Nazali kokanisa ndako ya Koloneli. Esalemáká naino te na bato ya Mabota, kasi bazalaki kokila bilei pe kobondela. Pe ntango moto na Nzambe wana, mosakoli wana, akómaki kuna: “Pe wana azalaki koloba maloba oyo, Molimo Mosantu ekitaki likolo na baoyo bazalaki koyoka Liloba.” Nzambe, pesa biso liyangani ya ndenge wana. “Wana Petelo azalaki koloba maloba oyo.” E Nzambe, bamilengelaki. Bazalaki kokila bilei. Bazalaki kozela. Bazalaki sembo. Bazalaki bobele “kozela” te, bazalaki “kozela kino”.

²⁷⁷ Bantóma yango bazalaki kino Nzambe akitaki kati na bango, pe bakokaki komona Ye pe kosolola na Ye. Babimaki ná mitema oyo ezikisaki mpenza mokili. Bazalaki na mpiko, pe bakendekei mpenza na bisika oyo bato bakokaki kokata bango mitó. Balobaki: “Ezali malamú ete tóyokela bino, to bibongiseli na bino, to bino bato ya bibongiseli? To, tosengeli koyokela Nzambe? Bino moko bótala yango.” Pe na mbala moko, bobele ntango batikaki bango, bakendekei lisusu koteya Nkombo na Yesu Klisto. E Nzambe, pesa biso—pesa biso yango, Nkolo.

²⁷⁸ Télémisela biso moto oyo Ozali kolobela na Makomi. Pakola ye, Nkolo. Nasengi ete áya. Tinda ye, Nkolo. E Nzambe, mitema na biso ya nzala ezali kolela. Tinda ye, Nkolo, mpo ázongisa bato na Kondima ya ba-tata, mpo álongola bango na makambo ya kobinisa ya bibongiseli, kino na kobikela makambo ya solosolo elongo na Nzambe, ndenge esalemaki na Pantekote, lingomba ya solosolo lisusu, oyo ezali kopela móto, ná Nsango yango moko, Kondima yango moko, Malakisi yango moko, Biblia yango moko, Nzambe yango moko ná elembo yango moko. Pesa biso mosakoli, Nkolo.

²⁷⁹ Bikisa babeli kati na biso lelo, Nkolo. Bato mosusu bazali awa oyo bazali na bosenga. Nabondeli mpo na bango, Tata. Nazui ntango mingi, naumeli na ntongo oyo, kasi tala bango oyo bazali kaka awa.

Na mpokwa moko, wana Polo azalaki koteya butu mobimba, mwana mobali moko akweyaki longwa na likolo ya ndako pe akufaki. Aláláki mpongi. Akánaki yango te, kasi a—aláláki mpongi. Akweyaki, pe bomoi na ye ebimaki. Pe ntóma yango abondelaki, pe bomoi ezongaki kati na ye.

²⁸⁰ E Nkolo Nzambe, bato mingi awa basili kokweya na bokono. Pe wana tozeli mingi, tolekisi ntango ya kosilisa liyangani, ezali na bato oyo bazali kobela. E Nzambe, tika ete nguya yango, Molimo Mosantu yango—yango oyo ayáká mpo na moto na moto kati na Likonzi na Móto, Oyo Amitálisaka pe Asálaka ete bato bayéba Nani Ye azali, pe biso tondimeli Ye, tika ete Ázinga moto nyonso oyo azali awa lelo. Bikisa babeli. Tondisa na Molimo. Pesa kosikolama na lolenge nyonso, Nkolo, mpo tosengeli na yango. Tondisa mitema na biso na kondima, Nzambe, na kondima

ekufaka te, na kondima ezangi mobémbano mpo tozali na YANGO ELOBI NKOLO. Kokisa yango, Nkolo.

²⁸¹ Ezali bato na Yo, Nsango na Yo, Liloba na Yo, basali na Yo. Pe zabolo azali na makoki moko te likolo na biso. Akoki ata koboma biso te ntango mongombo oyo ekobomama. “Mpo soki mongombo oyo ya mokili ebebisami, tozali na mosusu oyo ezali kozela.” Akoki kosala biso mabe moko te, mpo eloko nyonso oyo ezali monguna na biso ezali monguna na Yo, mpo tozali ya Yo. Tosombámá na motuya, ya Makila ya motuya ya Yesu.

Yango wana, bino milimo mabe oyo bokangi bato oyo na bokono, napámeli yo, na Nkombo na Yesu Klisto, ete bóbima na moko moko na bango. Lokola mosali na Nzambe, oyo atatoli ete Liloba oyo ezali Solo, bótika bango. Bozali na makoki moko te. Makambo nyonso bolobaka ete bozali na yango, esilaki na Kalvari. Pe bokoki kokanga bango lisusu te.

²⁸² Sikawa, Nzambe, pesa na mobali pe mwasi, mwana mobali to mwana mwasi nyonso oyo azali awa, kondima mpo na kondima yango. Liloba esili kolobama. “Soki olobi na ngomba oyo: ‘Longwa wana,’ pe otii ntembe na motema na yo te.” “Libondeli ya kondima ekobikisa mobeli.” “Okozua eloko oyo osengi.” Toyebi yango. Tozali na elikia wana epai na Nzambe. Soki tozali na kondima mpenza, soki Nzambe azali kobika kati na biso, tondimi yango. Pe nayebi ete ezali bongo, Nkolo. Na boye, kokisa yango, lelo, mpo na bokono pe lobiko. To, nasengeli koloba, nasengelaki koloba, lobiko liboso, na sima bokono. Kokisa yango, Nkolo, mpo molimo ezali na motuya koleka nzoto.

²⁸³ Kasi baoyo, ntango mosusu, molimo na bango esili kobikisama, kasi nzoto oyo ya kala ezali naino ya Satana, ayebi ete akozua yango na ntango ya suka. Akonyokola yango pe akozongisa yango. Nkusú ya mabelé ekotambola kati na yango pe ekosilisa kolia yango. Kasi akosimba molimo wana ata moke te, mpo ezali libula ya motuya ya Nzambe. Pe na nzela na bomoi yango, lokola oyo ya lokasa, ekozonga epai na Nzambe Oyo apesaki yango; ekoya lisusu na eleko ya sima, ná nzoto ya sika, oyo Satana akoki kosimba ata moke te. Ata bompaka to eloko mosusu nyonso pe ekosimba yango te. Ekozala nzoto ekembisami. Tozali kozela yango, Nkolo. Pambola bato na Yo sikawa. Bazali ya Yo. Pe natiki bango na loboko na Yo. Nasengi yango na Nkombo na Yesu.

[Ndeko Neville apesi lisakoli—N.D.E.] Nkembo... Lokumu... [Ndeko mobali mosusu apesi lisakoli.]

²⁸⁴ Oyo wana ezali liloba na ngai te. Oyo wana ezali Liloba na Ye. Oh, eloko tosengeli na yango, na ngonga oyo, na ngonga tozali kobika na yango! Bozali kososola te, baninga, ete Nzambe ayaka epai na bato minene ya lokumu te? Afandaka kati na basokemi, makambo ya komikitisa pe ya mike. Ntango mosusu bozali kososola te makambo ezali kosalema sikasikawa, makambo ezali

koleka kati na ndako oyo, eloko ezali kosalema kati-kati na bato oyo sikawa.

²⁸⁵ Mpo na nini Molimo alobaki, na ebandeli: “Liboso Násalela bango, ata eloko nini,” Ndeko Higginbotham? “Bósenzela Nsango oyo, mpamba te Nasili kopesa Yango,” eloko moko ya ndenge wana, “mpo na kokebisa bino na makambo oyo ekoya.” Bótala makambo oyo esalemaki.

²⁸⁶ Makambo mosusu, Makomi oyo nakomaki awa, nasimbaki yango ata moke te, pe nabimaki libanda na yango mpenza. Nakambamaki kuna na Molimo Mosantu. Bomoni? Makomi mosusu, nasimbaki yango ata moke te. Nakendeki mpenza na likambo mosusu, na mobimba. Mbala na mbala, nazalaki koyoka eloko moko koya, nabaluki pe namoni esika yango ezalaki. Molimo ezali koloba na ngámbo nyonso sikawa.

²⁸⁷ Oh, bandeko, bózala na eyóngi, bózala sembo. Bómeka te kotalela . . . Bomoni, bozali—bozali koluka eloko ya monene, oyo ezali kongenga.

Ntango oyo, basakoli nyonso, ata Dawidi alobaki: “Na Boyei ya Nkolo, ete, ngomba nyonso ekokitisama, pe bi—pe bisika ya nse ekomatisama.” Alobaki: “Ba-ngomba ekopumbwa lokola bana ya mpate, pe nkasa nyonso ekobéta maboko.” Ee, bato bakanisaki ete ekozala nini, ntango Yesu ayaki?

Esukaki ndenge nini? Mobange ya motei ya komikitisa, oyo atángaki te. Na mibu libwa, akendeki na bilíki, ezalaki mpo bato bálakisa ye mosala te, kasi mpo Nzambe á—álakisa ye mosala. Ntango abimaki, azalaki na eteni ya loposo ya mpate oyo amizingaki na yango, ná nkunza na elongi mobimba, atondaki na nkunza, pe suki kino na kingo na ye. Ezalaki ye kofanda na bilíki, azalaki kolia mápalela, elingi koloba mayoyo, mápalela ya zamba ná mafuta ya nzoi, ntango azalaki kofanda na bilíki. Ntango ayaki, atelemaki na potopóto ya mabóngo, pe asakolaki boyei ya Masiya. Pe Masiya ayaki kuna, Moto lokola bato nyonso, pe azuaki libatisi. Pe basakoli nyonso basakoláká koloba ete ekozala likambo monene oyo esalémá te, pe ezalaki bongo. Bomoni?

²⁸⁸ Bazali kozela ete likambo moko ya monene, likambo oyo ezali kongenga, ésalema. Bomoni? Molimo Mosanti engengaka te. Epelaka. Kongenga ezali ya mokili. Kopela ezali ya Nzambe.

Pelé likolo na ngai, Nkolo, yango nde libondeli na ngai. Pesa ngai komikitisa. Kamáta ngai, bóngola ngai pe pesa ngai lolenge. Molimo na Nzambe na bomoi, kitisa mpio likolo na ngai. Bóngola ngai, pesa ngai lolenge. Kómisa ngai ya Yo moko, Nkolo. Kamata ngai mpenza.

²⁸⁹ Nayebi mpenza ete Molimo ya Klisto ezali kotambola na kati ya ndako oyo na ntongo oyo. Nzambe oyo akosambisa mokili azali mpenza awa sikawa, lokola na bosóló mpenza natelemi na eteyelo oyo. Ezalaki na kotatolama na yango, ya Liloba, mbala

moko, mibale, misato, ndenge Biblia elobi mpenza. Boyokaki yango ndenge efandaki kimia na ntango yango, sima na yango? Moko, mibale, misato, nyonso na molongo ya molimo, nyonso na molongo ya Makomi. Oh, bófungola mitema na bino pe bósosola. Oh, oyo ntango kitoko, likambo nini ekoki kosalema na ntango oyo!

²⁹⁰ Bazalaki na eteni ya ndako ya likolo, bango nyonso na motema moko, kozela. “Mpo baoyo batalelaka Nkolo bakozua makasi ya sika. Ná mapapu lokola mpongo, bakomata likolo.”

²⁹¹ Komata bobele kuna te mpo na koloba: “Nkolo, nayoki mawa mpo na masumu na ngai. Sikawa nayambi na kondima ete nasili kozua Molimo Mosantu,” pe okei.

Baoyo batalelaka Nkolo, ba-mpóso, mikolo, to ata ndenge nini, bakozua makasi ya sika. Ná mapapu ya mpongo, bakomata likolo. Bakopota mbangu kasi bakolemba te. Soki batamboli, bakokweya sénza te. “Lakisa ngai, Nkolo. Lakisa ngai, Nkolo, koyeba kozela.” Bótálela Nkolo.

²⁹² Butu na moi, ntango nyonso, Ana azalaki na tempelo, azalaki kobondela ntango nyonso, butu na moi. Ntango bayaki na Yesu kuna. Ayaki, miso ekúfá, kino na ndako, atambolaki zingazinga. Mwasi mokufi miso, atiaki maboko na ye likolo na Ye pe apambolaki Nzambe. Mpamba te, na bokúfi miso na ye ya nzoto, na molimo na ye, atambwisamaki na Molimo, kino esika Ye azalaki.

²⁹³ Kuna, Simeona azalaki kozela Ye, kuna, na eteni ya ndako ya mabondeli, kuna na sima, ayebaki ete Molimo Mosantu apesaki ye elaka, ete akokufa te; mobange ya mibu ntuku mwambe, pene na ntuku libwa. Pe azalaki. . . ayebisaki bato polele: “Nakomona kufa te kino nakomona Masiya.” Pe bobele na miniti yango moko, mwa Bébé moko. . .

Azalaki nini? Moto ya lokumu te, babáteli nyonso batelemaki na bokebi, ntango bakotisaki Masiya, azingami, na bopolo pe kitoko mpenza, bonzéngá pe malasi, solo kitoko lokola ba-bébé oyo bayáká mpo na kobulisama. Kasi mwa mama oyo basilaki koloba mabe mpo na ye, balobaki: “Aboti Mwana, libanda na libala mosantu.” Azingamaki na bilamba ya ekanganeli, bazingaki Ye na bilamba ya ekanganeli ya ngómbé mibali, ezalaki bango koleka na Ye kati na ndako-a-nzambe, bato nyonso bazalaki kotelema mosika na Ye.

Kasi mwa bato moke wana, mwa etónge moke wana eyaki. Ana azalaki moko na bango. Simeona, mosusu, azalaki koleka na molongo, ayebaki te na ntango nini akobwaka miso likolo na Mwana yango. Atombolaki maboko pe alobaki: “Nkolo, tika ete mosali na yo ákende na kimia sikawa, kokokana na Liloba na Yo, mpo miso na ngai emoni lobiko na Yo.” Hmm. Bomoni? Eloko moko ya monene, ya kongenga te. Kopela; pe ata balobaki mabe mpo na yango, ezalaki elembo.

²⁹⁴ Pe, lelo, bato balobaka mabe mpo na elembo. Ezali na boyokani moko te. Yango—Yango... Bazali kolobela yango mabe, pe ezali kofingama mpenza. Kasi ezali elembo oyo etiolami, elembo oyo bato bazali kolobela mabe. Biblia elobeli yango: “Elembo, oyo bazali kolobela mabe.”

²⁹⁵ Tómkanisela yango na nzela na biso ya bozongi na bandako. Bótika ata moke te ete Nsango oyo ékufa longwa na mitema na bino. Ata bokosala nini, bósala yango te. Bómaniola Yango, butu na moi. Pe bóbondela, butu na moi, mpo Nzambe átelemisa motátoli na Ye sikawa. Tosili komilengela, mpo nandimi ete etikali moke, ntango ekosila. Tozali kokóma.

²⁹⁶ “Ekozala ndenge nini, ntango nini, Ndeko Branham?” Nayebi te. Ntango mosusu lelo. Ekoki kosalema lobi. Soki esalemi lelo te, nakozela yango lobi. Pe ekoki kosalema na mobu oyo, na mobu ekoya, na mibu zomi. Ntango mosusu mibu ntuku misato, nayebi te ntango nini ekosalema. Kasi nalobi, kobanda sikawa, bómilengela miníti moko na moko.

²⁹⁷ Pe bózua yango lokolo eloko ya momesano te. Bósala yango te. Bópema te, butu na moi, kino bokosolola na Nzambe. Bókíma kozala na bato sima na bino. Bómemama na kotótómwa te. Bósala yango te. Yango nde esalaka ete bato bálekisa ndelo pe bábanga yango, bomoni, ezali mpo na bilanda-landa ya bato balekisaka ndelo. Bómeka kondima yango te; ata moke te. Bótikala wana kino bósolola na Nzambe. Sima na manso, ezali likambo ya molimo na yo, pe esika nini yo moko okolekisa Seko na Seko. Pe ndimisámá mpenza ete opesi bobele mbote ya loboko te pe olobi endimeli moko te, to—to oyambi eloko moko bobele na kondima te. Komeka kosala bongo te. Solóla na Nzambe. Tika ete Nzambe ásolola na yo, pe tálá makambo ekosalamela yo. Tálá malamú ba—mpósa na yo pe makambo ekosalema, na ntango wana okoyeba soki osololaki na Nzambe to te.

²⁹⁸ Mpo na bino baoyo bondimeli Ye na ntongo oyo. Mpo na bino, pe na—nalobelaki likambo ya kobenga bato na etumbelo. Boyebi ndenge bazalaki kosala yango na Biblia? “Baoyo nyonso bandimaki Nkolo, baoyo nyonso bandimaki Nkolo bazuaki libatisi na Nkomo na Yesu Klisto mpo na bolimbisi ya msumu na bango.” Soki naino o... Tobéngisa naino bato na etumbelo te. Babengisaki bato liboso te. Soki osali bongo, okozua biloko ya ndenge na ndenge. Okomona mobali moko koya na etumbelo, ná lolendo, pe afukami, mpo moto moko alukaki kozua ye. O—o—osengeli kosala makasi yango mbala mibale mpo na kozua ye lisusu. Bomoni? Pe osali nini? Ozui biloko ya ndenge na ndenge na kati. Pe Yesu alobaki: “Baoyo nyonso Tata apésá Ngai bakoya epai na Ngai.” Kangáma na Liloba yango. Nzambe akosála oyo etikali. Ezali solo. Ezali solo. Nzambe akosála oyo etikali.

²⁹⁹ Nzambe ápambola bino. Nazali kolikia ete nakomona bino lisusu na mpokwa oyo, nakanisi, moto nyonso oyo akokoka.

Nayebi ete mingi kati na bino bakoya te, basengeli kokende. Ngai nakozala awa, na mpokwa, mpo na koyoka ndeko na ngai, soki ekozala mokano na Nzambe. Naboyi kozua ntango ya mateya na ye nyonso mibale.

³⁰⁰ Pe—pe Ndeko Neville azali moto na Nzambe ya bopolo. Pe nayebi, nayebi nani. . . Ntango nayokaka ye koteya, nayebi ete eutaka mbala moko na motema na ye. Nayebi yango. Pe Ndeko Neville, ndenge alobaki na mpokwa wana, ntango abakisaki maloba, alobaki ete nalobáká likambo moko. “Mokolo moko nakobatisa ye na Nkombo na Yesu.” Nasalaki yango. Mpo na nini? Namonaki eyóngi pe bosembo kati na ye. Nayebaki ete soki ye. . . soki ekokaki kopesamela ye, pe namonaki ete ye. . . pe soki a—akokaki mpenza komona Yango, miso na ye ekofungwama, akoyamba Yango. Nazalaki kozela, pe nayebisaki losambo: “Bómitungisa te, motei ya Metodiste wana akoya kaka.” Pe ye oyo lelo, mokengeli ya mongombo, atele mi mpenza ngwi na mosala, kati na Nzango oyo. Andimaka Nzambe. Pe nayebi, soki nayoki eloko oyo euti na Ndeko Neville, nayebi ete ezali eloko ya solosolo, euti na Nzambe, mpo azali moto ya lolenge wana.

³⁰¹ Nasili kotia maboko na miswale na bino awa, nabondeli mpo na yango. Nandimisami ete, moko moko na bino asili kozua lipamboli longwa na Nzambe. Nandimisami ete Nzambe azali na mitema na bino.

³⁰² To—toyaka awa mpenza te mpo na—mpo na kozua lipamboli longwa na Nzambe, ntango toyaka awa. Mikolo nyonso oyo tozalaka na péma, tozalaka na lipamboli longwa na Nzambe. Eloko toyaka kosala awa, ezali kosembolama, kolongola, kokata ngenga ya mitema na biso, koya liboso na Nzambe, pe kondima Nzambe na mitema na biso mobimba.

³⁰³ Bomikanisela Liloba na Nkolo. Pe bóbosana te, pe bózanga te, kobwaka miso na elembo ya solo etindami na Nzambe.

Na bongo, nakozongisa liyangani na Ndeko Neville, áloba nyonso alingi koloba.

[Ndeko Branham alongwe na eteyelo, pe Ndeko Neville alobi: “Ya solo mpenza, holala, nazali koyebisa bino, nayebi ete Nzambe atatoli eloko moko tozalaki kozela na ebandeli ya liyangani. Wana nazali kotala bilongi ebele oyo, na ntongo oyo, nayebi ete ezali malamú ndenge bozali awa. Pe ezali malamú ndenge ngai nazali awa. Pe nasengelaki kozala awa, pe bino bosengelaki kozala awa. Bosali mosala na bino malamú mpenza soki bomoni ete ezali bongo. Eloko bozui na ntongo ya lelo, bokoki kozua yango mpo bozui yango uta na Nzambe. Pe mbala moko, sima na yango, tokokota na mosala ya kobatisa. Ndeko Willard Collins moto akosala mosala ya kobatisa, tozali na bato mibale to koleka. Tokosepela komona bato nkama na nkama kozua libatisi na Nkombo na Yesu Klisto, na ntongo ya lelo.”—N.D.E.] Amen! [“Bózua mokano ya kotalisa kondima na bino

na lolenge ya polele. Kondima ezali mosala te. Kondima, oyo moto alobeli, ezali malamumu te. Kasi kondima, oyo atalisi, ezali etinda ya Biblia.”] Amen! Ya solo. [“Kondima ekoki kotalisama na nzela na botósi. Tika ete Nzambe ápesa na moto nyonso oyo azali awa na ntongo ya lelo, oyo ayoki ete abelemi mpo na kosala yango, áya. Soki oyo ezali. . . Soki likambo oyo ezali mwa moke libanda na mwango na yo oyo osilaki kobongisa, to ntango mosusu osengeli kokutana na moto moko nokinoki, to eloko mosusu, soki okoki kozongisa yango ata mwa moke na sima, mpo na kokokisa mosala ya botósi oyo; nandimi, lokola ndeko na bino ya komikitisa kati na Klisto, pe lokola mosali elongo na mosakoli ya Nzambe, nandimi ete, kozua mokano yango sikawa, ekozala—ekozala eloko ya malamumu koleka oyo okoki kopona.”] Nzambe ápesa yango. . . ? . . . [“Pe épesamela yo ete óya kozua esika na yo elongo na bato mosusu oyo basengeli kozua libatishi, mpo ókoka kotángama kati na baoyo bazali na etóngá moke yango. Oh, ezali kitoko mingi, kozala moko na bato na Ye, pe kolongobana na Liloba na Ye, boye te? Tótelema elongo, biso nyonso, wana tozali komilengela mpo na kosilisa. Mokolo ya lomingo oyo ekoya, Ndeko Branham akozala lisusu elongo na biso. Tóbosana liyebisi yango te. Alobi ete akozala awa na mpokwa ya lelo, kasi alobi te ete akoteya. Ata bongo, mposa na ngai ezali, ntango nyonso, ete áteya. Pe azali na ntina ya kobanga esika natelemi mpo na yango te. Mposa na ngai, na ntembe te, koyeba ete Nsango pe ko—kobengama, mosala oyo azali na yango, ezali mposa monene ya ntango ya suka oyo. Nakotikela ye esika, na ntango nyonso. Nakoloba yango liboso na bato nyonso pe liboso na ye moko. Nakotikela ye esika na esengo nyonso, na ntango nyonso, na liyangani nyonso, mpo na Nsango ya motuya oyo nandimi. Mpamba te, Nzambe alobi na nzela na biso mibale, na ntongo oyo, mpo na kotalisa elembo oyo. Pe nasepeli kozua libaku malamumu ya kokoka kozala moto oyo akoki kotikela ye esika. Pe nakosepela, na mpokwa ya lelo, nakosepela kosala yango, soki ndeko na biso, mosali pe mosakoli ya Nzambe, abelemi mpenza mpo na yango, na esengo nyonso, nakotikela ye esika. Bobele ndenge akoloba, ndenge akomona. Kasi, auti koloba, pe tokotika liloba ya suka ya makambo nyonso na maboko ya Nzambe na-Nguya-nyonso.” Ndeko Branham azongi na eteyelo—N.D.E.]

³⁰⁴ Okoki kosenga eloko ya malamumu koleka te, kouta na ndeko ya solosolo, boye te? Ntina oyo ngai. . . Bomoni, baninga, na—nayebi ete bolingaka ngai. Bolingaka Ndeko Neville. Bolingaka bato na Nzambe nyonso. Tolinganaka kati na biso. Soki ntango moko ezalaki, oyo tosengelaki kolingana koleka, ezali lelo. Tosengeli kozala mpenza pembeni, elongo, ndeko, na lolenge ete biso. . . Tosengeli kozala koleka mpenza bandeko ya makila, ya mibali pe ya basi. Yangu nde bolingo oyo esengeli kozala na mitema na biso, bamoko mpo na bamosusu, lokumu pe limemia, ya likolo koleka. Pe nasepelaka na yango. Nasepelaka na likambo ya solosolo.

³⁰⁵ Pe awa, Ndeko Neville, ná Ndeko Higginbotham. Ndeko, nakanisi oyo wana ezalaki Ndeko Funk. Eyokanaki mpenza lokola ye te, oyo apesaki nsango wana, kuna, oyo epesami. Euti na Nzambe, ba-nsango yango, baninga. Ya solo mpenza. Moto nyonso oyo azali na lisosoli ya molimo ayebi yango.

³⁰⁶ Kasi likambo yango ezali boye. Ntango nazalaki koya, na—nasepelaka na Ndeko Neville mingi mpenza kino nakanisi boye, bomoni. Na—nalingaka koloba likambo moko te soki nazui mpenza likambo ya koyebisa bino te, kouta na Nzambe. Bomoni? Pe nazuaki likambo oyo—likambo oyo eyelaki ngai na motema, eleki mikolo mibale to misato, pe nazuaki libaku ya koyekola yango malamumu bobele lobi na mpokwa, natángaki mwa Makomi. Yango wana nayaki kopesa yango. Elongwe na maboko na ngai sikawa. Bomoni? Nyonso oyo bokosala na yango, etali, etali bino, bomoni. Kasi elongwe na maboko na ngai.

³⁰⁷ Kasi, ngai ná Ndeko Neville, tozala ndenge wana. Soki nayezi awa, mpo na—mpo na koloba mwa moke, eloko moko ya ndenge wana, pe Ndeko Neville azali na liteya euti na Nzambe, ngai nakofanda. Iyo, yango mpenza. Nakotika esika na liteya ya Nzambe, ntango nyonso. Bomoni? Tosalaka bongo ngai na ye. Yango wana nalobaka ete nako . . . Soki—soki Nzambe apesi ngai eloko te, na bongo, ntango mosusu, ekozala bobele bilobela. Pe soki Nzambe apesi Ndeko Neville eloko moko boye, pe ngai nazali awa na eteyelo, na ntongo ya lomingo, na mpokwa ya lomingo, to na ntango nini, Ndeko Neville ako . . . Akozala ndeko ndenge moko wana. Akoya koloba na ngai: “Ndeko Branham, nandimaka ete ozali mosali na Nzambe, kasi Nkolo apesi ngai liteya moko.” Okosala yango, boye te? [Ndeko Neville alobi: “Amen.”—N.D.E.] Iyo, misie.

³⁰⁸ Nakosala ndenge moko epai na ye, soki alingi koteya. Nakoloba: “Ndeko Neville, okoki kolimbisa ngai? Nzambe apesi ngai nsango moko. Nasengeli koyebisa yango na bato, sikawa.” Pe ye, Ndeko Neville, akotika nzela; ye to ngai, moko na mosusu. Bomoni? Tosalaka nde bongo. Na bongo soki biso, soki nazali na eloko moko mpenza te, na bongo ngai . . .

³⁰⁹ Nalingaka mpenza koyoka ye koteya. Nayokaki ye. Bato boni bayokaki ye, na mpokwa ya lomingo eleki? Ezalaki liteya malamumu mpenza, nayebisi bino. Esanganaki malamumu mpenza, ná oyo eteyamaki na ntongo.

Pe, bandeko, nazali koyebisa bino, bozali na Liloba na Nzambe ekoki oyo bosengeli kobika malamumu mpenza pe kozala malamumu.

Nzambe ápambola yo sikawa, Ndeko Neville.



ELEMBO YA SOLO OYO ETIOLAMI LIN61-1112

(A True Sign That's Overlooked)

Liteya oyo ya Ndeko William Marrion Branham, eteyamaki liboso na Ngelesa mokolo mwa lomingo na ntongo, mokolo mwa 12, sanza ya zomi na moko, na mobu 1961, na Branham Tabernacle, na Jeffersonville, Indiana, U.S.A., ekamatamaki uta na bande pe ekomamaki mobimba na yango na Ngelesa. Ndimbola oyo ya Lingala ekomami pe ekabolami na Voice Of God Recordings.

LINGALA

©2017 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org

Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyíkanisama te, kotiana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, komélá:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org